

ЎЗБЕКИСТОН РЕСПУБЛИКАСИ
ҚОНУН ҲУЖЖАТЛАРИ
Тўплами

5-6-сон
(41-42)
2002 й.
март

Ўзбекистон Республикаси Қонун ҳужжатлари тўплами тўрт бўлимдан иборат:
тўпламнинг биринчи бўлимида Ўзбекистон Республикаси қонунлари ва Олий Мажлиснинг қарорлари эълон қилинади;
иккинчи бўлимда Ўзбекистон Республикаси Президентининг фармон ва фармойишлари эълон қилинади;
учинчи бўлимда Вазирлар Маҳкамасининг қарор ва фармойишлари эълон қилинади;
тўпламнинг тўртинчи бўлимида Ўзбекистон Республикаси Конституциявий судининг қарорлари эълон қилинади.

МУНДАРИЖА

Иккинчи бўлим

37. «2002 йилнинг 1 апрелидан бошлаб иш ҳақи, пенсиялар, стипендиялар ва ижтимоий нафақалар миқдорини ошириш тўғрисида» Ўзбекистон Республикаси Президентининг 2002 йил 26 мартдаги ПФ-3045-сон Фармони
38. «Пул массаси ўсишини чеклаш ва молия интизомига риоя этиш масъулиятини ошириш чора-тадбирлари тўғрисида» Ўзбекистон Республикаси Президентининг 2002 йил 30 мартдаги ПФ-3047-сон Фармони

Учинчи бўлим

39. «Уй-жой мулкдорлари ширкатларини қўллаб-қувватлашга доир қўшимча чора-тадбирлар тўғрисида» Ўзбекистон Республикаси Вазирлар Маҳкамасининг 2002 йил 1 мартдаги 74-сон қарори
40. «Илмий-тадқиқот фаолиятини ташкил этишни такомиллаштириш чора-тадбирлари тўғрисида» Ўзбекистон Республикаси Вазирлар Маҳкамасининг 2002 йил 4 мартдаги 77-сон қарори
41. «Иш ҳақи ўз вақтида тўланишига доир қўшимча чора-тадбирлар тўғрисида» Ўзбекистон Республикаси Вазирлар Маҳкамасининг 2002 йил 19 мартдаги 88-сон қарори
42. «Табиий газ етказиб бериш ва унинг учун ҳисоб-китоб қилиш тизимини янада такомиллаштириш тўғрисида» Ўзбекистон Республикаси Вазирлар Маҳкамасининг 2002 йил 20 мартдаги 90-сон қарори

44. «Давлат тасарруфидан чиқариш ва хусусийлаштириш дастурлари амалга оширилишини, хорижий инвестицияларни жалб этиш фаоллаштирилишини таъминлашга доир қўшимча чора-тадбирлар тўғрисида» Ўзбекистон Республикаси Вазирлар Маҳкамасининг 2002 йил 26 мартдаги 97-сон қарори
45. «2002-2004 йилларда уй-жой фондини газни ҳисобга олиш приборлари билан жиҳозлашга доир қўшимча чора-тадбирлар тўғрисида» Ўзбекистон Республикаси Вазирлар Маҳкамасининг 2002 йил 28 мартдаги 99-сон қарори
46. «Ўзгалар парваришига мухтож ёлғиз кексалар, пенсионерлар ва ногиронларга ижтимоий ёрдам кўрсатишни кучайтириш тўғрисида» Ўзбекистон Республикаси Вазирлар Маҳкамасининг 2002 йил 29 мартдаги 106-сон қарори

ИККИНЧИ БЎЛИМ

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

37 2002 йилнинг 1 апрелидан бошлаб иш ҳақи, пенсиялар, стипендиялар ва ижтимоий нафақалар миқдорини ошириш тўғрисида

Республика аҳолисининг даромадларини янада ошириш ва фуқароларнинг ижтимоий муҳофазасини кучайтириш мақсадида:

1. 2002 йилнинг 1 апрелидан бошлаб бюджет муассасалари ва ташкилотлари ходимларининг иш ҳақи, барча турдаги пенсиялар ва ижтимоий нафақалар, олий ўқув юртлари талабаларининг, ўрта махсус ва хунар-техника билим юртлари ўқувчиларининг стипендиялари ўрта ҳисобда 1,15 баравар оширилсин.

2. 2002 йилнинг 1 апрелидан бошлаб Ўзбекистон Республикаси ҳудудида:

энг кам иш ҳақи — ойига 3945 сўм;

ёшга доир пенсия — ойига 7800 сўм;

ягона тариф сеткаси бўйича бошланғич (нулинчи) разряд ойига 3945 сўм;

болаликдан ногиронларга бериладиган нафақа ойига 7800 сўм;

зарур иш стажига эга бўлмаган кекса ёшдаги ҳамда меҳнатга лаёқатсиз фуқароларга бериладиган нафақа — ойига 4725 сўм миқдоридан белгилансин.

3. Белгилаб қўйилсинки, иш ҳақига қўшиладиган устама ва қўшимча ҳақларнинг барча турлари, шунингдек пенсиялар, икки ёшгача бўлган болаларни тарбиялаётган оналарга, болалик оилаларга бериладиган нафақалар ҳамда энг кам иш ҳақига нисбатан белгиланган бошқа тўловлар 2002 йил 1 апрелдан бошлаб мазкур Фармонда белгиланган энг кам иш ҳақи миқдоридан келиб чиққан ҳолда амалга оширилади.

4. Ўзбекистон Республикаси Меҳнат ва аҳолини ижтимоий муҳофаза қилиш вазирлиги вазирликлар, идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари, бюджетдан молияланадиган ташкилот ва муассасалар билан биргаликда мазкур Фармон қоидаларидан келиб чиққан ҳолда пенсиялар, нафақалар, стипендиялар ҳамда бюджет муассасалари ва ташкилотлари ходимларининг мансаб маошлари миқдорини ўз вақтида қайта ҳисоблаб чиқишни таъминласинлар.

5. Бюджет муассасалари ва ташкилотлари ходимларининг иш ҳақи, пенсиялар, нафақа ва стипендияларнинг оширилиши билан боғлиқ харажатлар республика Давлат бюджети ва бюджетдан ташқари Пенсия жамғармаси ҳисобидан амалга оширилсин.

Ўзбекистон Республикаси Молия вазирлиги Меҳнат ва аҳолини ижтимоий муҳофаза қилиш вазирлиги билан биргаликда 2002 йилги Давлат бюджети ва бюджетдан ташқари Пенсия жамғармасининг харажатларига тегишли тузатишлар киритсин.

6. Хўжалик ҳисобидаги корхона ва ташкилотлар меҳнатга ҳақ тўлаш базавий фондининг белгиланган миқдорларидан келиб чиққан ҳолда ишлаб чиқариш самарадорлигини ошириш ҳамда меҳнат сарфини камайтириш ҳисобидан 2002 йил 1 апрел-

дан бошлаб иш ҳақи миқдорини мазкур Фармонда белгиланган энг кам иш ҳақи миқдори га мувофиқ оширсинлар.

7. Ўзбекистон Республикаси Президентининг 2001 йил 29 июндаги ПФ-2893-сон Фармони (8-банди истисно қилинган ҳолда) ўз кучини йўқотган деб ҳисоблансин.

Ўзбекистон Республикаси Президенти И. КАРИМОВ

Тошкент ш.,
2002 йил 26 март,
ПФ-3045-сон

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

38 Пул массаси ўсишини чеклаш ва молия интизомига риоя этиш масъулиятини ошириш чора-тадбирлари тўғрисида

Пул массасини бошқаришни такомиллаштириш, банкдан ташқари айланмани қисқартириш, молия интизомига риоя этиш ва олинган кредитларни ўз вақтида қайтариш масъулиятини ошириш мақсадида:

1. Ўзбекистон Республикаси Марказий банкининг 2002 йил 1 июндан бошлаб Ўзбекистон Республикаси Марказий банки облигацияларини муомалага чиқариш тўғрисидаги таклифи маъқуллансин.

Белгилансинки:

Ўзбекистон Республикаси Марказий банки облигациялари давлат қимматли қоғозлари ҳисобланади ва юридик ҳамда жисмоний шахслар ўртасида жойлаштирилади;

Ўзбекистон Республикаси Марказий банки облигацияларининг ликвидлиги Марказий банк тасарруфидаги барча активлар билан таъминланади.

2. Ўзбекистон Республикаси Марказий банки:

Марказий банк облигацияларини чиқаришнинг асосий шартларини бир ой муддатда ишлаб чиқсин ва Ўзбекистон Республикаси Адлия вазирлиги билан биргаликда тегишли норматив-методик ҳужжатларни белгиланган тартибда тасдиқласин;

пул массасини тезкор бошқариш мақсадида валюта ва пул депозитлари, давлат қимматли қоғозлари ва бошқа биринчи тоифали активлар таъминоти остида, пул бозорида вужудга келаётган фоиз ставкалари асосида тижорат банкларига уч ойгача бўлган муддатга кредитлар берсин ва жалб қилсин.

3. Ўзбекистон Банклар уюшмаси, тижорат банкларининг пластик карточкалар бўйича миллий ва хорижий валюта ҳисоб-китоблар ўтказишни таъминловчи Ягона банклараро процессининг марказини ташкил этиш тўғрисидаги таклифи қабул қилинсин.

Тижорат банклари пластик карточкалар воситасида ҳисоб-китоб қилиш учун фойдаланиладиган банкоматлар ва жиҳозларни импорт қилишда божхона тўловлари

(божхонада расмийлаштириш учун йиғимлардан ташқари) тўлашдан 2005 йил 1 январгача озод қилинсин.

4. Тижорат банклари:

маҳаллий ҳокимият ва бошқарув органлари хўжалик юритувчи субъектлар билан биргаликда иш ҳақи тўлашда, чакана савдони амалга оширишда, коммунал ва бошқа хизматлар учун тўловда яқка тартибдаги ва корпоратив пластик карточкаларни кенг жорий этиш, аҳолига хизмат кўрсатувчи минибанклар, банк кассалари ва банкоматлар тармоғини кенгайтириш чора-тадбирларини кўрсин;

ликвидли мол-мулкларни, шу жумладан ишлаб чиқариш ва ижтимоий инфратузилма объектларини, транспорт воситаларини ҳамда корхона ва ташкилотларнинг бошқа ликвидли активларини гаровга қўйган ҳолда кредитлар бериш амалиётини кенгайтирсин;

кредитлар беришда таваккалчиликни ва гаровнинг бозор қийматини пухта баҳолашни ҳисобга олган ҳолда қайтаришлик, муддатлилик ва ўзини ўзи қоплаш тамоийилларига қатъий риоя қилсин;

кредитлар муддатини узайтириш амалиётини кескин чекласин, фақат кечиктирилган муддат даврида қайтарилиши учун маблағлар тушинининг аниқ манбалари бўлган кредитларнинг тўлов муддатини кечиктиришга рухсат берсин.

5. Белгилаб қўйилсинки, хўжалик юритувчи субъектлар томонидан кредит бўйича уларнинг мажбуриятлари ўз вақтида бажарилмаган тақдирда гаровга қўйилган мол-мулк, қарз олувчининг розилигидан қатъи назар, кейинчалик сотиш ҳуқуқи билан банк мулкига ўтади.

Хўжалик юритувчи субъектлар томонидан кредитлар бўйича қарзлар ўз вақтида қайтарилмаган тақдирда тижорат банкларига:

қарздорларнинг иккиламчи ҳисоб рақамига, шу жумладан уларнинг бошқа банкларда очилган иккиламчи ҳисоб рақамига ижро этилиши мажбурий бўлган инкассо талаблари қўйиш;

Ҳукумат кафолати остида берилган кредитларга ўз вақтида хизмат кўрсатиш учун пул маблағларини ҳисобдан чиқаришни иш ҳақи, бюджет ва бюджетдан ташқари жамғармалар билан ҳисоб-китоблар навбати билан ўтказилгандан сўнг амалга ошириш;

қарздорнинг пул маблағлари етишмаган тақдирда кредит бўйича қарзларни қарздорнинг розилигига кўра унинг ликвидли мол-мулки ҳисобидан ёки хўжалик суди орқали қарздорнинг мол-мулкига қаратиш йўли билан ундириш ҳуқуқи берилсин.

Ўзбекистон Республикаси Марказий банки, Молия вазирлиги, Давлат мулки қўмитаси, Адлия вазирлиги, Олий хўжалик суди банк кредитлари бўйича қарзлар ўз вақтида тўланмаган тақдирда ундиришни қарздорларнинг ликвидли мол-мулкига қаратиш тартибини бир ой муддатда ишлаб чиқиб, Вазирлар Маҳкамасига киритсинлар.

6. Вазирлар Маҳкамаси комплекслари, вазирликлар ва идоралар, хўжалик юритувчи субъектлар раҳбарлари зиммасига кредит ресурслари ҳисобидан амалга оширилаётган инвестиция лойиҳаларини тайёрлаш экспертизадан ўтказиш ва амалга ошириш бўйича қонунчилик талабларига риоя этилиши ҳамда қарз маблағларининг ўз вақтида қайтарилишини таъминлаш юзасидан шахсий жавобгарлик юклатилсин.

Ўзбекистон Республикаси Молия вазирлиги Марказий банк билан биргаликда Молия вазирлиги томонидан тижорат банклари кредитларининг таъминоти учун берилган кафолатларни бажариш механизми тўғрисидаги Низомни бир ой муддатда ишлаб чиқсин ва белгиланган тартибда тасдиқласин.

7. Ўзбекистон Республикаси Марказий банки:

аҳолининг банклардаги омонатларини кафолатлашнинг ягона шартларини шакл-

лантириш ва банкларнинг молиявий барқарорлигини ошириш мақсадида янги ташкил этилаётган хусусий тижорат банклари устав капиталининг энг кам миқдорига бўлган талабни 1,25 млн. АҚШ долларининг сўмдаги эквиваленти ҳажмида белгиласин.

2002 йилнинг 1 июнидан бошлаб тижорат банклари томонидан ўз маблағларини ва жалб этилган маблағларни ички активларга жойлаштириш миқдори тўланган устав капитали ва банкнинг ички мажбуриятлари миқдоридан кам бўлмаслиги тўғрисидаги талабни жорий этсин.

8. Хўжалик юритувчи субъектларга шакллантирилган устав жамғармаси миқдоридан ортиқ бўлмаган ҳажмида ўз облигацияларини чиқариш ҳуқуқи берилсин.

Ўзбекистон Республикаси Давлат мулки қўмитаси вазирликлар ва идоралар билан биргаликда 2002 йилнинг иккинчи яримидан бошлаб хўжалик юритувчи субъектларнинг, биринчи навбатда республиканинг молиявий аҳволи барқарор, юқори ликвидли активларга ва катта миқдордаги пул оқимларига эга бўлган йирик корхоналари ва компанияларининг корпоратив облигацияларини чиқариш чора-тадбирларини кўрсин.

9. Ўзбекистон Республикаси Адлия вазирлиги тегишли вазирликлар ва идоралар билан биргаликда бир ой муддатда:

қонун ҳужжатларига мазкур Фармондан келиб чиқадиган ўзгартириш ва қўшимчалар тўғрисида Вазирлар Маҳкамасига таклифлар киритсин;

вазирликлар ва идораларнинг норматив ҳужжатлари мазкур Фармонга мувофиқлаштирилишини таъминласин.

10. Мазкур Фармон ижросини назорат қилиш Ўзбекистон Республикаси Бош вазири Ў.Т. Султонов ва Ўзбекистон Республикаси Марказий банки раиси Ф.М. Муллажонов зиммасига юклансин.

Ўзбекистон Республикаси Президенти И. КАРИМОВ

Тошкент ш.,
2002 йил 30 март,
ПФ-3047-сон

УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

39 Уй-жой мулкдорлари ширкатларини қўллаб-қувватлашга доир қўшимча чора-тадбирлар тўғрисида

Ўзбекистон Республикаси Президентининг «Уй-жой мулкдорлари ширкатларининг фаолиятини ривожлантириш борасидаги қўшимча чора-тадбирлар тўғрисида» 2002 йил 26 февралдаги ПФ-3038-сон Фармонида мувофиқ ҳамда уй-жой мулкдорлари ширкатлари фаолияти учун зарур қулай шарт-шароитлар яратиш мақсадида Вазирлар Маҳкамаси **қарор қилади:**

1. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларининг уй-жой мулкдорлари ширкатлари фаолиятига амалий ёрдам кўрсатиш бўйича ишлари қониқарсиз деб эътироф этилсин.

Қорақалпоғистон Республикаси Вазирлар Кенгаши Раиси, вилоятлар, шаҳарлар ва туманлар ҳокимлари уй-жой мулкдорлари ширкатлари фаолияти учун зарур шарт-шароитлар яратиш, аҳолига коммунал хизмат кўрсатиш соҳасида иқтисодий ислохотларни амалга ошириш учун шахсан жавобгар эканликлари тўғрисида огоҳлантирилсинлар.

2. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари:

бир ой муддатда уйлар атрофидаги ер участкалари ширкатларга улардан фойдаланиш ҳуқуқини берувчи давлат далолатномаларини берган ҳолда қонунчилик тартибида бириктириб қўйилишини таъминласинлар, шунингдек уларни ишлаб чиқариш фаолияти учун турар жойга мўлжалланмаган бинолар билан таъминласинлар;

уй-жой фондида таъмирлаш-тиклаш ишлари таннархини пасайтириш мақсадида уй-жой мулкдорлари ширкатларини зарур моддий-техника ресурслари билан пулли асосда, марказлаштирилган тартибда таъминласинлар;

турар жойларнинг ички муҳандислик коммуникацияларини реконструкция қилиш ва мукамал таъмирлашни амалга оширишда газ, иссиқ ва совуқ сувни ҳисобга олиш кватирга приборлари мажбурий тартибда ўрнатилишини таъминласинлар;

турар жойларни реконструкция қилиш ва мукамал таъмирлаш учун пудратчиларни танлаш бўйича қонун ҳужжатларига мувофиқ танловлар (тендерлар) ўтказилишини ташкил этсинлар.

3. Ўзбекистон Республикаси Макроиқтисодиёт ва статистика вазирлиги, Молия вазирлиги, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари:

2003-2006 йилларга мўлжалланган Инвестиция дастурини шакллантиришда 1991 йилгача қурилган уй-жойларнинг ички муҳандислик коммуникацияларини ва умумий равишда фойдаланиладиган жойларини реконструкция қилиш ва мукамал таъмирлашга Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари учун ажратиладиган марказлаштирилган капитал қўйилмалар лимити умумий ҳажмининг 3 фоизигача миқдорда маблағ ажратсинлар;

йил чораги яқунлари бўйича маҳаллий бюджетлар даромад қисми маблағларининг прогноздан ортиқча тушумларининг бир қисмини 1991 йилгача қурилган уй-жойларнинг ички муҳандислик коммуникацияларини ва умумий равишда фойдаланиладиган жойларини реконструкция қилиш ва мукамал таъмирлашга йўналтирсинлар;

Ўзбекистон Республикаси Қонун ҳужжатлари тўплами, 2002 й.

уйлар атрофидаги ҳудудларни ободонлаштириш, мавзелар ичидаги йўллар, йўлаклар, ирригация тизимларини таъмирлаш, ташқи ёритиш ва уй-жой мулкдорлари ширкатларига бириктирилган зоналарни кўкаламзорлаштириш ишларини амалга ошириш учун бюджетдан ташқари маблағлар ва бошқа манбалар жалб этилишини таъминлашлар.

4. Белгилансинки, уй-жой мулкдорлари ширкатлари умумий йиғилишнинг розилиги билан фаолиятдан олинган даромадларини кейинчалик уй-жойларнинг ички муҳандислик коммуникацияларини ва умумий равишда фойдаланиладиган жойларини реконструкция қилиш ва мукамал таъмирлаш ишларини амалга ошириш учун махсус депозит ҳисоб рақамига мақсадли йўналтирган ҳолда спорт-соғломлаштириш ва болалар ўйинлари марказлари ва майдончалари қуриш ва улардан фойдаланишни пулли асосда амалга оширишлари мумкин.

5. Ўзбекистон Республикаси Молия вазирлиги Марказий банк, Давлат солиқ қўмитаси ва «Ўзкоммунхизмат» агентлиги билан биргаликда бир ой муддатда:

Уй-жой мулкдорлари ширкатларининг қўшимча фаолият турларидан олган даромадларининг махсус депозит ҳисоб рақамига тушиши ва улардан фойдаланиш тартибини;

1991 йилгача қурилган уй-жойларнинг ички муҳандислик коммуникацияларини ва умумий равишда фойдаланиладиган жойларини реконструкция қилиш ва мукамал таъмирлаш ишларини маблағ билан таъминлаш ва амалга ошириш тартиби тўғрисидаги низомни ишлаб чиқсин ва белгиланган тартибда тасдиқласин.

6. Тижорат банкларига уй-жой фондини мукамал таъмирлашда мақсадли фойдаланиш учун уй-жой мулкдорлари ширкатларига имтиёзли кредитлар ажратилишини назарда тутиш тавсия этилсин.

Ўзбекистон Республикаси Марказий банки тижорат банклари билан биргаликда уй-жой мулкдорлари ширкатларига имтиёзли шартларда кредитлар ажратиш тартибини бир ой муддатда ишлаб чиқсин ва қабул қилсин.

7. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан ишлаб чиқилган 1991 йилгача қурилган уй-жойларнинг ички муҳандислик коммуникацияларини ва умумий равишда фойдаланиладиган жойларини мукамал таъмирлаш жадвали иловага* мувофиқ тасдиқлансин.

8. «Ўзкоммунхизмат» агентлиги Ўзбекистон Республикаси Молия вазирлиги, Давлат солиқ қўмитаси ва Марказий банки билан биргаликда Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларининг буюртманомаларига биноан 2002 йилнинг биринчи ярим йили мобайнида аҳолига коммунал хизмат кўрсатиш соҳасида амалга оширилаётган ислохотлар, молия-хўжалик фаолиятини юритиш масалалари бўйича уй-жой мулкдорлари ширкатлари бошқарувлари раислари ва бухгалтерларининг ўқишини ташкил этсин.

9. Ўзбекистон Республикаси Адлия вазирлиги «Ўзкоммунхизмат» агентлиги, бошқа манфаатдор вазирликлар ва идоралар билан биргаликда бир ой муддатда Вазирлар Маҳкамасига ушбу қарорга мувофиқ амалдаги қонун ҳужжатлари ва норматив-ҳуқуқий ҳужжатларга ўзгартириш ва қўшимчалар тўғрисида таклифлар киритсин.

10. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари К.Н. Тўлаганов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2002 йил 1 март,
74-сон

* Илова берилмайди.

ЎЗБЕКИСТОН RESPUBLIKASI VAZIRLAR MAҲKAMASINING ҚARORI

40 Илмий-тадқиқот фаолиятини ташкил этишни такомиллаштириш чора-тадбирлари тўғрисида

Ўзбекистон Республикаси Президентининг «Илмий-тадқиқот фаолиятини ташкил этишни такомиллаштириш тўғрисида» 2002 йил 20 февралдаги ПФ-3029-сон Фармонини бажариш юзасидан ҳамда илмий тадқиқотлар ва технологик ишланмалар сифатига қўйилган замонавий талабларга мувофиқ илмий-техника ва инновация фаолиятини янада ривожлантиришни, шунингдек мамлакатнинг илмий салоҳиятидан самарали фойдаланишни таъминлаш мақсадида Вазирлар Маҳкамаси **қарор қилади:**

1. Куйидагилар:

Ўзбекистон Республикаси Вазирлар Маҳкамаси ҳузуридаги Илмий-техника тараққиётини Мувофиқлаштириш Кенгаши тўғрисидаги Низом 1-иловага мувофиқ;

Фан ва технологиялар марказининг, шунингдек Илмий-техника тараққиётини Мувофиқлаштириш Кенгаши ҳузуридаги Йирик илмий ва инвестиция лойиҳаларини экспертизадан ўтказиш кенгашининг тузилмаси ва штатдаги ходимларининг чекланган сони 2 ва 3-иловаларга мувофиқ;

Илмий-техника тараққиётини Мувофиқлаштириш Кенгаши ҳузуридаги Инновация илмий-техника фаолиятини маблағ билан таъминлаш жамғармаси маблағларини шакллантириш ва сарфлаш тартиби тўғрисидаги Низом 4-иловага мувофиқ тасдиқлансин.

2. Илмий-техника тараққиётини Мувофиқлаштириш Кенгаши Ўзбекистон Республикаси Молия вазирлиги, Макроиктисодиёт ва статистика вазирлиги билан биргаликда:

Фан ва технологиялар маркази ҳамда Йирик илмий ва инвестиция лойиҳаларини экспертизадан ўтказиш кенгаши тўғрисидаги низомларни икки ҳафта муддатда ишлаб чиқсин ва белгиланган тартибда тасдиқласин;

илмий-тадқиқот ва инновация фаолиятини ташкил этиш ва маблағ билан таъминлашнинг грантли тизимини амалга киритишни таъминлаш мақсадида фундаментал ва амалий илмий тадқиқотлар, технологик ишланмалар ва мамлакатни ижтимоий-иқтисодий ривожлантиришнинг давлат устуворликларига мувофиқ бўлган инновация лойиҳалари дастурларини шакллантириш, тақдим этиш, экспертизадан ўтказиш ва тасдиқлаш тартибига доир норматив ҳужжатларни икки ой муддатда ишлаб чиқсин ва тасдиқласин.

3. Илмий-техника тараққиётини Мувофиқлаштириш Кенгаши ҳузуридаги Фан ва технологиялар маркази директори мақоми, моддий ва маиший таъминот шароитлари бўйича вазирга, Мувофиқлаштириш Кенгаши ҳузуридаги Йирик илмий ва инвестиция лойиҳаларини экспертизадан ўтказиш кенгаши раҳбари ҳамда Марказ директорининг ўринбосари эса вазир ўринбосарига тенглаштирилсин.

4. Ўзбекистон Республикаси Молия вазирлиги 2002 йилдан бошлаб Фан ва технологиялар маркази ҳамда Йирик илмий ва инвестиция лойиҳаларини экспертизадан ўтказиш кенгаши таъминоти учун зарур маблағларни белгиланган тартибда назарда тутсин.

5. Илмий-техника тараққиётини Мувофиқлаштириш Кенгаши:

Ўзбекистон Республикаси Давлат мулки қўмитаси билан биргаликда бир ҳафта муддатда тугатиш комиссияси тузсин ва Ўзбекистон Республикаси Фан ва техника давлат қўмитаси балансида бўлган асосий фондлар, мол-мулклар ва моддий бойликларни Фан ва технологиялар марказига ҳамда Илмий-техника тараққиётини Мувофиқлаштириш Кенгаши ҳузуридаги Йирик илмий ва инвестиция лойиҳаларини экс-

пертизадан ўтказиш кенгашига беришни қонунчиликда белгиланган тартибда амалга оширсин;

Илмий-техника тараққиётини Мувофиқлаштириш Кенгашининг янги ташкил этилган таркибий бўлинмаларини икки ой муддатда юқори малакали кадрлар ва мутахассислар билан таъминласин.

6. Фан ва технологиялар марказига аспирантлар ва магистрант талабалар орасидан Ўзбекистон Республикаси Президенти давлат стипендиатларини аниқлаш функцияси юклансин. Номзодларни кўриб чиқиш ва стипендияларни маблағ билан таъминлаш Вазирлар Маҳкамасининг 1993 йил 25 мартдаги 157-сон ва 2001 йил 17 августдаги 344-сон қарорларида назарда тутилган тартибда амалга оширилсин.

7. Ўзбекистон Республикаси Макроиктисодиёт ва статистика вазирлиги, Молия вазирлиги тасарруфида илмий муассасалар бўлган вазирликлар ва идоралар билан биргаликда, Илмий-техника тараққиётини Мувофиқлаштириш Кенгаши билан келишган ҳолда илмий муассасалар томонидан бажариладиган илмий тадқиқотлар ва технологик ишланмаларни шакллантириш ва маблағ билан таъминлаш тартибини бир ой муддатда ишлаб чиқсинлар ва тасдиқласинлар.

Илмий-техника тараққиётини Мувофиқлаштириш Кенгаши Ўзбекистон Республикаси Молия вазирлиги билан биргаликда республикада илмий-тадқиқот фаолиятини такомиллаштиришга доир кўрилган чора-тадбирларни тушунтириш юзасидан бир ой муддатда Фанлар академиясида, тегишли вазирликлар, идоралар ва хўжалик бирлашмаларида, шунингдек илмий муассасаларда кенг кўламдаги ишларни ташкил этсин ва амалга оширсин.

8. Ўзбекистон Республикаси Молия вазирлиги тузилмасида қўшимча равишда 4 штат бирлиги ажратилган ҳолда Фанни маблағ билан таъминлаш бўлими ташкил этилсин.

9. Фан ва технологиялар маркази ҳамда Ўйрик илмий ва инвестиция лойиҳаларини экспертизадан ўтказиш кенгаши Тошкент шаҳар, Х. Сулаймонова кўчаси, 29-уйга жойлаштирилсин.

Ўзбекистон Республикаси Давлат мулки қўмитаси, Тошкент шаҳар ҳокимлиги бир ҳафта муддатда Тошкент шаҳар, Х. Сулаймонова кўчаси, 29-уйда жойлашган бинони Илмий-техника тараққиётини Мувофиқлаштириш Кенгаши ҳузуридаги Фан ва технологиялар маркази балансига берсин.

10. Ўзбекистон Республикаси Давлат патент идораси Ўзбекистон Республикаси Адлия вазирлиги билан биргаликда Давлат патент идораси Ўзбекистон Республикаси Вазирлар Маҳкамаси тасарруфига берилиши муносабати билан унинг номи, реквизитлари ва норматив ҳужжатларига белгиланган тартибда икки ҳафта муддатда зарур ўзгартиришлар киритсин.

11. Ўзбекистон Республикаси Вазирлар Маҳкамасининг «Ўзбекистон Республикаси Фан ва техника давлат қўмитасининг фаолиятини ташкил этиш масалалари тўғрисида» 1992 йил 19 февралдаги 71-сон қарори, шунингдек Ўзбекистон Республикаси Вазирлар Маҳкамасининг 1992 йил 3 августдаги 360-сон, 1992 йил 9 сентябрдаги 419-сон ва 1992 йил 8 декабрдаги 570-сон қарорлари ўз кучини йўқотган деб ҳисоблансин.

12. Мазкур қарорнинг бажарилишини назорат қилиш Ўзбекистон Республикасининг Бош вазири Ў.Т. Султонов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2002 йил 4 март,
77-сон

Ўзбекистон Республикаси Қонун ҳужжатлари тўплами, 2002 й.

Вазирлар Маҳкамасининг
2002 йил 4 мартдаги 77-сон қарорига
1-ИЛОВА

Ўзбекистон Республикаси Вазирлар Маҳкамаси ҳузуридаги Илмий-техника тараққиётини Мувофиқлаштириш Кенгаши тўғрисида НИЗОМ

I. Умумий қоидалар

1. Ушбу Низом Ўзбекистон Республикаси Президентининг «Илмий-тадқиқот фаолиятини ташкил этишни такомиллаштириш тўғрисида» 2002 йил 20 февралдаги ПФ-3029-сон Фармониغا мувофиқ ташкил этилган Ўзбекистон Республикаси Вазирлар Маҳкамаси ҳузуридаги Илмий-техника тараққиётини Мувофиқлаштириш Кенгаши (кейинги ўринларда «Мувофиқлаштириш Кенгаши» деб аталади) фаолиятини тартибга солади.

2. Мувофиқлаштириш Кенгаши Ўзбекистон Республикаси илмий-техника фаолияти соҳасидаги юқори мувофиқлаштириш органи ҳисобланади.

3. Мувофиқлаштириш Кенгаши ўз фаолиятини Ўзбекистон Республикаси Конституцияси ва қонунлари, Ўзбекистон Республикаси Президентининг фармонлари ва фармойишлари, Ўзбекистон Республикаси Вазирлар Маҳкамасининг қарорлари ҳамда мазкур Низом асосида амалга оширади.

II. Мувофиқлаштириш Кенгашининг асосий вазифалари

4. Қуйидагилар Мувофиқлаштириш Кенгашининг асосий вазифалари ҳисобланади: фундаментал ва амалий илмий тадқиқотлар, технологик ишланмаларнинг, шунингдек мамлакат иқтисодиётидаги қисқа, ўрта ва узоқ муддатли истиқболга мўлжалланган таркибий ўзгартиришларнинг устувор йўналишларини иқтисодиёт тармоқларини ва ижтимоий соҳани ривожлантириш стратегияси билан боғлаган ҳолда белгилаш;

йирик илмий-тадқиқот дастурлари ва технологик лойиҳаларнинг мамлакат манфаатларига ва иқтисодий ҳамда ижтимоий ривожлантиришнинг давлат устуворликларига мувофиқлигидан келиб чиққан ҳолда уларнинг экспертизасини ташкил этиш ҳамда улар бўйича эксперт хулосаларни тасдиқлаш;

мамлакатни ижтимоий-иқтисодий ривожлантиришнинг давлат устуворликларига мувофиқ бўлган йирик илмий дастурлар ва технологик лойиҳаларни тасдиқлаш;

Илмий тадқиқотлар, технологик ишланмалар ва инновация лойиҳаларининг ҳар йилги давлат дастурини тасдиқлаш;

инновацион ғояларни яратувчи, жаҳон илм-фанидаги янги, истиқболли тенденцияларни доимий равишда кузатиб борувчи ва уларни мамлакат манфаатлари йўлида фойдаланиш учун жамловчи истеъдодли олимларни қўллаб-қувватлаш тизимини яратиш.

III. Мувофиқлаштириш Кенгашининг таркиби ва тузилмаси

5. Мувофиқлаштириш Кенгашининг шахсий таркиби Ўзбекистон Республикаси Президентининг Фармониغا мувофиқ тасдиқланади.

Мувофиқлаштириш Кенгаши унинг раиси — Ўзбекистон Республикасининг Бош вазири томонидан бошқарилади.

Мувофиқлаштириш Кенгаши таркибига раис ўринбосарлари ҳамда фундаментал ва амалий илмий тадқиқотларнинг устувор йўналишлари бўйича секцияларда ишлайдиган Мувофиқлаштириш Кенгаши аъзолари киради.

6. Мувофиқлаштирувчи Кенгаш доирасида фундаментал ва амалий илмий тадқиқотларнинг устувор йўналишлари бўйича қуйидаги секциялар тузилади:

демократик давлатнинг ташкил топиши ва ривожланишининг, фуқаролик жамиятини шакллантиришнинг ҳуқуқий асослари секцияси;

тарихий, миллий ва умуминсоний кадриятларни уйғунлаштириш асосида жамиятни маънавий ва ахлоқий янгилаш секцияси;

мамлакатнинг минерал-хом ашё ресурслари салоҳиятини ривожлантириш ва ундан оқилона фойдаланиш йўналишлари секцияси;

тупроқ унумдорлигини ошириш, чўлланишга қарши курашнинг юқори технологиялари, сув ресурсларидан оқилона фойдаланиш ва уларни кўпайтириш, атроф-муҳитни муҳофаза қилиш ва экологик хавфсизлик секцияси;

қишлоқ хўжалиги экинларининг юқори самарали навлари ва моллар зотлари, генетика, физика-кимё биологияси, биотехнологиялар, тиббиёт ва соғлиқни сақлаш секцияси;

ёқилғи-энергетика ресурсларини тежаш, улардан оқилона фойдаланиш ва уларни кўпайтириш, мамлакатнинг энергетика мустақиллиги ва хавфсизлигини таъминлаш секцияси.

Зарур ҳолларда секциялар сони ва уларнинг йўналиши Мувофиқлаштириш Кенгаши қарорига кўра ўзгариши мумкин.

Мувофиқлаштириш Кенгаши секциялари ҳар қайси секциянинг фаолият йўналишига мувофиқ мамлакатнинг етакчи олимлари ва мутахассисларидан шакллантирилади.

Секциялар раҳбарлари Мувофиқлаштириш Кенгаши қарорига кўра унинг аъзолари орасидан сайланади.

7. Қуйидагилар Мувофиқлаштириш Кенгашининг таркибий бўлинмалари ҳисобланади:

Фан ва технологиялар маркази;

Йирик илмий ва инвестиция лойиҳаларини экспертизадан ўтказиш кенгаши.

8. Илмий тадқиқотлар ва технологик ишланмаларни маблағ билан таъминлаш тизимини ривожлантириш ва такомиллаштириш, инновация фаолиятига вазирликлар, идоралар ва хўжалик юритувчи субъектлар маблағларини, хорижий ҳомийлар бадалларини ҳамда халқаро грантларни жалб этиш учун Мувофиқлаштириш Кенгаши ҳузурида Инновация илмий-техника фаолиятини маблағ билан таъминлаш жамғармаси ташкил этилади.

IV. Мувофиқлаштириш Кенгаши ваколатлари

9. Мувофиқлаштириш Кенгаши:

Фан ва технологиялар маркази ҳамда Йирик илмий ва инвестиция лойиҳаларини экспертизадан ўтказиш кенгаши таклифларини таҳлил қилиш асосида мамлакатни ижтимоий-иқтисодий ривожлантиришнинг давлат устуворликларига мувофиқ бўлган йирик илмий дастурлар ва технологик лойиҳаларни тасдиқлайди;

мамлакатни илмий-техник ривожлантириш устуворликлари ва стратегиясидан келиб чиққан ҳолда Илмий тадқиқотлар, технологик ишланмалар ва инновация лойиҳаларининг ҳар йилги давлат дастурини тасдиқлайди;

йирик илмий-тадқиқот дастурлари ва технологик лойиҳаларнинг мамлакат манфаатларига ва иқтисодий ҳамда ижтимоий ривожлантириш давлат устуворликларига

мувофиқлигидан келиб чиққан ҳолда уларнинг экспертизасини ташкил этади ҳамда улар бўйича эксперт хулосаларни тасдиқлайди;

инновацион ғояларни яратувчи, жаҳон илм-фанидаги янги, истиқболли тенденцияларни доимий равишда кузатиб борувчи ва уларни мамлакат манфаатлари йўлида фойдаланиш учун жамловчи истеъдодли олимларни қўллаб-қувватлаш механизмларининг амалга оширилишини таъминлайди;

мамлакатни илмий-техник ривожлантиришнинг қисқа, ўрта ва узоқ муддатли вазифалари масалаларини ҳал этиш заруриятидан келиб чиққан ҳолда Мувофиқлаштириш Кенгаши иш тартибини белгилайди;

Мувофиқлаштириш Кенгаши аъзолари орасидан унинг секциялари раҳбарларини, шунингдек секцияларнинг шахсий таркибини тасдиқлайди;

Мувофиқлаштириш Кенгашининг кўриб чиқиши учун киритиладиган масалаларни таҳлил қилиш ва тайёрлаш, Мувофиқлаштириш Кенгаши ваколатига кирувчи бошқа вазифаларни ҳал этиш учун Фанлар академияси, вазирликлар ва идоралар, хўжалик бирлашмалари, корхоналар, илмий муассасалар ва олий ўқув юр்தларининг юқори малакали мутахассисларидан иборат эксперт кенгашлар таркибини тасдиқлайди;

Инновация илмий-техника фаолиятини маблағ билан таъминлаш жамғармаси маблағларини сарфлаш йўналишларини белгилайди;

жаҳон илм-фани ва технологиялари ривожланишининг илғор тенденциялари тўғрисидаги маърузаларни тинглайди.

10. Мувофиқлаштириш Кенгаши қуйидаги ҳуқуқларга эга:

Мувофиқлаштириш Кенгашининг ижро этувчи органлари ҳисобланадиган Фан ва технологиялар маркази ҳамда Йирик илмий ва инвестиция лойиҳаларини экспертизадан ўтказиш кенгаши тўғрисидаги низомларга ўзгартиришларни тасдиқлаш ва киритиш;

илмий-техника тараққиёти тенденцияларини ҳисобга олган ҳолда Мувофиқлаштириш Кенгашида фундаментал ва амалий илмий тадқиқотларнинг устувор йўналишлари бўйича қўшимча секциялар ташкил этиш, шунингдек муҳимлигини йўқотган йўналишлар бўйича секцияларни тугатиш;

Йирик илмий ва инвестиция лойиҳаларини экспертизадан ўтказиш кенгаши хулосалари асосида илмий дастурлар, технологик ишланмалар ва инновация лойиҳаларини маблағ билан таъминлашга (уни тўхтатишгача) ўзгартиришлар киритиш;

сифатли ва холисона экспертизани таъминлаш талабларидан келиб чиққан ҳолда эксперт кенгашлари таркибини янгилаш;

ўзининг ижро этувчи органлари тузилмасига улар ходимларининг тасдиқланган сони доирасида ўзгартиришлар ва уларнинг раҳбарлари лавозимига номзодлар тўғрисида Ўзбекистон Республикаси Вазирлар Маҳкамасига таклифлар киритиш;

мамлакатни илмий-техник ривожлантириш вазифаларига мувофиқ илмий-тадқиқот муассасаларини ташкил этиш, қайта ташкил қилиш ва тугатиш тўғрисидаги таклифларни ишлаб чиқиш ва Ўзбекистон Республикаси Вазирлар Маҳкамасига киритиш;

ўз ваколатлари доирасида республиканинг барча вазирликлари, идоралари, хўжалик бирлашмалари, корхона ва ташкилотлари учун бажариш мажбурий бўлган қарорлар қабул қилиш;

Фанлар академияси, вазирликлар, идоралардан ҳамда идоровий мансублигидан ва мулкчилик шаклларида қатъи назар, илмий ташкилотлардан таҳлилий материалларни ҳамда ўз олдида турган вазифаларни амалга ошириш учун зарур бўлган бошқа ахборотларни сўраб олиш.

V. Мувофиқлаштириш Кенгаши ишини ташкил этиш

11. Мувофиқлаштириш Кенгаши раиси унинг фаолиятига раҳбарлик қилади ва Мувофиқлаштириш Кенгашига юкланган вазифаларнинг бажарилиши учун жавоб беради.

Мувофиқлаштириш Кенгаши раиси бўлмаганда унинг функциясини ўринбосари бажаради.

12. Мувофиқлаштириш Кенгаши фаолияти қарорлар қабул қилишда тенг ҳуқуқлик ва коллегиялик принципларига асосланади.

13. Мувофиқлаштириш Кенгаши мажлиси унда Мувофиқлаштириш Кенгаши аъзоларининг оддий кўпчилиги қатнашган тақдирда ваколатли ҳисобланади.

Мувофиқлаштириш Кенгаши мажлисида протокол юритилади, уни Мувофиқлаштириш Кенгаши раиси имзолайди.

14. Мувофиқлаштириш Кенгаши мажлислари унинг ваколатига кирувчи масалалар тайёрланишига кўра, бироқ ҳар ярим йилликда камида бир марта ўтказилади.

15. Мувофиқлаштириш Кенгаши мажлисларини ташкилий-техник жиҳатдан таъминлаш Мувофиқлаштириш Кенгаши раиси ва раис ўринбосарлари томонидан амалга оширилади.

16. Мувофиқлаштириш Кенгаши қарорлари мажлисда қатнашаётган Мувофиқлаштириш Кенгаши аъзоларининг оддий кўпчилик овози билан қабул қилинади.

Мувофиқлаштириш Кенгашининг қабул қилинган қарордан норози бўлган аъзоси ўз фикрини ёзма равишда баён қилишга ҳақли, унинг фикри мажлис протокоliga қўшилади.

17. Мувофиқлаштириш Кенгаши қарори ижро этиш учун Мувофиқлаштириш Кенгаши ҳузуридаги Фан ва технологиялар марказига ҳамда Йирик илмий ва инвестиция лойиҳаларини экспертизадан ўтказиш кенгашига, шунингдек манфаатдор вазирликлар, идоралар, хўжалик бирлашмалари ва ташкилотларга жўнатилади.

18. Мувофиқлаштириш Кенгаши аъзолари ўз ишларини жамоатчилик асосида олиб боришади.


19. Мувофиқлаштириш Кенгаши ўз номи ёзилган бланкга эга бўлади.

**Илмий-техника тараққиётини Мувофиқлаштириш Кенгаши ҳузу-
ридаги Фан ва технологиялар марказининг тузилмаси**



Штатдаги ходимлар сони — 34 киши

**Илмий-техника тараққиётини Мувофиқлаштириш Кенгаши
ҳузуридаги Йирик илмий ва инвестиция лойиҳаларини экспер-
тизадан ўтказиш кенгашининг тузилмаси**



Штатдаги ходимлар сони — 17 киши

Вазирлар Маҳкамасининг
2002 йил 4 мартдаги 77-сон қарорига
4-ИЛОВА

**Илмий-техника тараққиётини Мувофиқлаштириш Кенгаши
ҳузуридаги Инновация илмий-техника фаолиятини маблағ
билан таъминлаш жамғармаси маблағларини шакллантириш ва
сарфлаш тартиби тўғрисида
НИЗОМ**

I. Умумий қоидалар

1. Илмий-техника тараққиётини Мувофиқлаштириш Кенгаши ҳузуридаги Инновация илмий-техника фаолиятини маблағ билан таъминлаш жамғармаси (кейинги ўринларда «Жамғарма» деб аталади) илмий тадқиқотлар ва технологик ишланмаларни маблағ билан таъминлаш тизимини ривожлантириш ва такомиллаштириш, уларнинг натижаларидан амалиётда фойдаланишнинг самарали механизминини таъминлаш, шунингдек мамлакатнинг илмий-техник соҳаси билан ҳамкорликда иқтисодиётнинг реал секторини инновация фаолиятига жалб этиш мақсадида ташкил этилган.

2. Жамғарма маблағларини сарфлаш йўналишлари Илмий-техника тараққиётини Мувофиқлаштириш Кенгаши (кейинги ўринларда «Мувофиқлаштириш Кенгаши» деб аталади) томонидан белгиланади.

3. Жамғарма маблағлари Мувофиқлаштириш Кенгаши ҳузуридаги Фан ва технологиялар марказининг (кейинги ўринларда «Марказ» деб аталади) махсус ҳисоб рақамида жамланади. Марказ Мувофиқлаштириш Кенгаши томонидан белгиланган йўналишлар бўйича маблағларни жорий тезкор бошқаришни амалга оширади.

**II. Жамғарма маблағларини шакллантириш тартиби ва улардан
фойдаланиш йўналишлари**

4. Қўйидагилар Жамғарма маблағларини шакллантиришнинг асосий манбалари ҳисобланади:

Давлат бюджети маблағлари;
хорижий ва мамлакатимиз ҳомийларининг бадаллари;
халқаро грантлар;
вазирликлар, идоралар ва хўжалик ҳисобидаги тузилмаларнинг маблағлари;
тижорат банклари ва хорижий молия институтларининг имтиёзли мақсадли кредитлари.

5. Давлат бюджети маблағлари Жамғармага ҳар ойда, Илмий тадқиқотлар ва технологик ишланмалар давлат дастурига мувофиқ инновация фаолиятини маблағ билан таъминлаш учун назарда тутилган бюджет маблағлари йиллик ҳажмининг ўн иккидан бир қисми миқдорида алоҳида сатрда ажратилади.

6. Хорижий ва мамлакатимиз ҳомийларининг бадаллари Жамғарманинг ҳисоб рақамига Марказнинг халқаро ташкилотлар ва мамлакатимиз ташкилотлари билан тузган битимлари ва аҳдлашувлари натижалари бўйича тушади.

7. Халқаро грантлар Жамғарманинг ҳисоб рақамига ҳукуматлараро битимларга мувофиқ, шунингдек Марказнинг халқаро ташкилотлар билан аҳдлашувлари бўйича тушади.

8. Вазирликлар, идоралар ва хўжалик юритувчи субъектларнинг маблағлари

Жамғарманинг ҳисоб рақамига уларнинг илмий-тадқиқот ишлари, технологик ишланмалар ва инновация лойиҳаларини бажаришга берган буюртмаларига мувофиқ уларнинг Марказ томонидан маблағ билан таъминлашда қатнашиш шартларида тушади.

9. Тижорат банклари ва хорижий молия институтларининг имтиёзли мақсадли кредитлари Жамғарманинг ҳисоб рақамига рентабелли илмий ва технологик ишланмаларни амалга оширишга Ўзбекистон Республикасининг халқаро молия институтлари билан тузган қарз битимларига мувофиқ тушади.

10. Жамғармада жамланадиган маблағлардан қўйидаги йўналишлар бўйича фойдаланилади:

танлов асосидаги фундаментал ва амалий тадқиқотларни ўз вақтида ва тўлиқ маблағ билан таъминлаш;

ишлаб чиқариш тармоқлари ва ижтимоий-гуманитар соҳадаги инновация лойиҳаларини маблағ билан таъминлашда қатнашиш учун грантлар ажратиш;

илм-фанни кўплаб талаб қиладиган ишлаб чиқаришларни, шу жумладан кичик ва ўрта бизнес соҳасида ташкил этиш мақсадида инновация лойиҳаларига имтиёзли кредитлар сифатида грантлар ажратиш.

11. Танлов асосидаги фундаментал ва амалий илмий тадқиқотларни маблағ билан таъминлаш, шунингдек инновация лойиҳаларига грантлар ажратиш Мувофиқлаштириш Кенгаши томонидан белгиланган мамлакат илмий-техника тараққиётининг устувор йўналишлари доирасида амалга оширилади.

12. Ишлаб чиқариш тармоқлари ва ижтимоий-гуманитар соҳадаги илмий фаолиятни маблағ билан таъминлашда қатнашиш Мувофиқлаштириш Кенгаши томонидан белгиланган устувор йўналишлар ва топшириқлар бўйича вилоятлар ҳокимликлари, вазирликлар, идоралар, хўжалик бирлашмалари, ташкилотлар ва ишлаб чиқариш тузилмаларининг буюртмалари бўйича ишларни бажаришга илмий муассасалар, илмий жамоалар, алоҳида олимлар ва мутахассислар ўртасида танлов ташкил этиш йўли билан Марказ томонидан Жамғарма маблағларидан амалга оширилади.

Илм-фанни кўплаб талаб қиладиган ишлаб чиқаришларни ташкил этиш мақсадида инновация лойиҳаларига имтиёзли кредитлар сифатидаги грантларни маблағ билан таъминлашда қатнашиш маблағни қайтариш асосида амалга оширилади. Жамғарма маблағлари лойиҳанинг ҳисобланган умумий қийматининг 50 фоизидан кўп бўлмаган миқдорда 5 йилдан кўп бўлмаган муддатга ажратилади.

13. Жамғарманинг хомийлар ва халқаро молия институтларидан олинган маблағлари битимлар ва аҳдлашувларнинг тегишли шартлари билан белгиланган тартибда Мувофиқлаштириш Кенгаши томонидан бошқа йўналишлар бўйича йўналтирилиши мумкин.

14. Жамғарманинг молиявий йили охиригача фойдаланилмаган маблағлари бюджетга олиб қўйилмайди ва мазкур Низомда назарда тутилган мақсадларга қатъий равишда йўналтирилади.

III. Жамғарма маблағларини шакллантириш ва улардан фойдаланиш юзасидан Марказнинг функциялари ва ҳуқуқлари

15. Марказ Жамғарма маблағларини жорий тезкор бошқариш учун Мувофиқлаштириш Кенгаши томонидан белгиланган тартибда:

вазирликлар, идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари, ташкилотлар ва ишлаб чиқариш тузилмаларининг танлов асосида илмий-тадқиқот ва инновация ишларини амалга ошириш юзасидан берилган буюртмаларининг мамлакат илмий-техника тараққиёти манфаатлари йўлида давлатнинг устувор йўналишлари ва вазифаларига мувофиқлигини кўриб чиқади;

илмий-тадқиқот ва инновация ишларига танлов ўтказиш учун молиявий маблағларга бўлган эҳтиёж ҳисоб-китобининг асосланганлигини текширади;

маблағ билан таъминлашда қатнашиш учун вилоятлар ҳокимликлари, вазирликлар, идоралар, ташкилотлар ва ишлаб чиқариш тузилмалари томонидан таклиф этилаётган илмий-тадқиқот ва инновация топшириқларининг техник-иқтисодий асосланишини ўрганади;

Мувофиқлаштириш Кенгашига илмий-тадқиқот ва инновация лойиҳаларини амалга оширишга маблағ билан таъминлашда қатнашиш шартлари бўйича таклифлар киритади;

илмий тадқиқотлар ўтказишга молиявий маблағлар ажратувчи ҳомийлар ва халқаро молия институтларини излайди ва уларни жалб этади;

лойиҳалар амалга оширилишининг ва маблағлардан мақсадли фойдаланилишининг доимий мониторингини олиб боради;

Мувофиқлаштириш Кенгашига ва Молия вазирлигига Жамғарма маблағларидан фойдаланилганлиги тўғрисида даврий ҳисобот тақдим этади.

16. Марказ қуйидаги ҳуқуқларга эга:

лойиҳаларни бажарувчи илмий муассасалар ва жамоалардан даврий ҳисобот олиш, лойиҳаларнинг амалга оширилишини баҳолаш ва мониторинг олиб бориш учун бошқа зарур ахборотларни сўраб олиш;

маблағлардан бошқа мақсадларда фойдаланилганлиги ва лойиҳани амалга оширишнинг техник-иқтисодий кўрсаткичларидан четга чиқиш ҳоллари аниқланган тақдирда Мувофиқлаштириш Кенгаши билан келишган ҳолда лойиҳаларни маблағ билан таъминлашни тўхтатиб қўйиш;

Мувофиқлаштириш Кенгаши билан келишган ҳолда қўшимча маблағлар жалб этиш юзасидан ҳомийлар ва халқаро молия институтлари билан битимлар ва шартномалар тузиш;

маблағ билан таъминлашда қатнашиш ва кредитлар олиш учун лойиҳаларнинг техник-иқтисодий асосланишини ўрганиб чиқишга мутахассисларни жалб этиш.

IV. Жамғарманинг даромадлари ва харажатлари кўрсаткичларини кўриб чиқиш ва тасдиқлаш тартиби

17. Марказ ҳар йили 1 сентябргача бўлажак йилга Жамғарманинг даромадлари ва харажатлари йўналишининг прогноз параметрларини Ўзбекистон Республикаси Молия вазирлиги билан келишган ҳолда Мувофиқлаштириш Кенгашига кўриб чиқиш учун тақдим этади. Прогноз параметрлари қуйидагилар ҳисобга олинган ҳолда ишлаб чиқилади:

ҳомийлар ва халқаро ташкилотларнинг Жамғармага жалб этиладиган маблағларининг, ҳуқуматлараро грантлар, кредитлар ва бюджетдан ташқари бошқа маблағ билан таъминлаш манбаларининг режалаштирилаётган миқдори;

танлов асосидаги амалдаги фундаментал ва амалий тадқиқотлар ва инновация лойиҳаларининг амалга оширилиши даражаси;

янгидан амалга ошириладиган танлов асосидаги илмий-тадқиқот ва инновация лойиҳаларига харажатлар миқдори.

18. Мувофиқлаштириш Кенгаши Жамғарманинг бўлажак молиявий йилга даромадлари ва харажатлари прогнозини кўриб чиқади, унинг даромадлар ва харажатлар сметасини тасдиқлайди ҳамда бўлажак йил давлат бюджети лойиҳасига киритишни кўриб чиқиш учун жорий йилнинг 15 сентябргача бўлган муддатда Ўзбекистон Республикаси Вазирлар Маҳкамасига киритади.

19. Марказ ҳисобот йилидан кейинги йилнинг 1 мартгача бўлган муддатда

Мувофиқлаштириш Кенгашига Ўзбекистон Республикаси Молия вазирлиги билан келишган ҳолда Жамғарма даромадлари ва харажатлари бажарилиши тўғрисидаги йиллик ҳисоботни тақдим этади.

20. Мувофиқлаштириш Кенгаши Жамғарма даромадлари ва харажатлари бажарилиши бўйича йиллик ҳисоботни кўриб чиқади ва уни ҳисобот йилидан кейинги йилнинг 1 апрелигача бўлган муддатда Ўзбекистон Республикаси Вазирлар Маҳкамасига тақдим этади.

V. Жамғарма маблағларидан мақсадли фойдаланилиши бўйича назорат ва жавобгарлик

21. Илмий муассасаларнинг Жамғарма маблағларидан мақсадли фойдаланишини тезкор назорат қилиш Марказ томонидан амалга оширилади.

22. Ўзбекистон Республикаси Молия вазирлиги Жамғарманинг Давлат бюджетининг тасдиқланган параметрлари доирасида ўз вақтида ва тўлиқ маблағ билан таъминланиши учун жавоб беради ҳамда Жамғарма маблағларидан мақсадли фойдаланилиши ва маблағларнинг ўз вақтида қайтарилиши устидан йиллик назоратни амалга оширади.

23. Жамғарма маблағларидан мақсадли фойдаланилиши учун Марказнинг Директори ва бош бухгалтери шахсан жавоб берадилар.

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

41 Иш ҳақи ўз вақтида тўланишига доир қўшимча чоратadbирлар тўғрисида

Фуқароларнинг конституциявий ҳуқуқ ва манфаатларини таъминлаш, мулкчилик шаклларида қатъи назар корхоналар ва ташкилотлар ходимларига иш ҳақи ўз вақтида ва тўлиқ тўланиши учун хўжалик юритувчи субъектларнинг жавобгарлигини ошириш мақсадида Вазирлар Маҳкамаси **қарор қилади:**

1. 2002 йил 1 апрелдан бошлаб мулкчилик шаклларида қатъи назар корхоналар ва ташкилотларнинг иш ҳақини товарлар билан натура шаклида тўлаши тақиқлансин, қишлоқ хўжалиги товар ишлаб чиқарувчилари томонидан етиштирилган ва қайта ишланган, ходимларнинг ёзма аризасига кўра шартномавий нархларда бериладиган қишлоқ хўжалиги маҳсулотлари бундан мустасно.

2. Тижорат банклари:

тегишли кафолат билан, шу жумладан юқори ликвидли мол-мулк гарови асосида (шу жумладан корхоналар ва ташкилотларнинг ишлаб чиқариш ва инфратузилма объектлари, транспорт воситалари ҳамда бошқа ликвидли активлари) иш ҳақи тўлаш учун хўжалик юритувчи субъектларга кредитлар берсинлар. Белгилансинки, кўрсатиб ўтилган кредитлар ўз вақтида қайтарилмаган тақдирда гаровга қўйилган мол-мулк, қарз олувчининг розилигидан қатъи назар, кейинчалик белгиланган тартибда уни сотиш ҳуқуқи билан тижорат банкининг мулкига ўтади;

тегишли равишда банкоматлар тармоғини кўпайтирган ҳолда электрон пластик

карточкалар воситасида иш ҳақи тўлашга доир банк хизматлари ҳажмини кенгайтирсинлар.

3. Белгилансинки, вазирликлар, идоралар, хўжалик бирлашмалари, мулкчилик шаклларида қатъи назар корхоналар ва ташкилотлар раҳбарлари ходимларга иш ҳақи ўз вақтида ва тўлиқ тўланиши учун шахсан жавоб берадилар.

Хўжалик бирлашмалари, мулкчилик шаклларида қатъи назар хўжалик ҳисобидаги корхоналар ва ташкилотлар раҳбарлари:

меҳнатга ҳақ тўлаш тариф сеткаларининг рағбатлантирувчи ролини оширишни, меҳнатга ҳақ тўлаш жамғармасининг тариф қисми ва тарифга қўшимча қисмлари ўртасидаги мақбул нисбатни таъминлашни ҳисобга олган ҳолда меҳнатга ҳақ тўлашнинг тариф сеткаларини бир ой муддатда қайта кўриб чиқсинлар;

хар бир ходимни тегишли даврда унга тўланадиган иш ҳақининг таркибий қисмлари, ушлаб қолинган пул миқдорлари ва унинг асослари, шунингдек тўланадиган умумий пул суммаси тўғрисида мажбурий тартибда ёзма шаклда хабардор қилсинлар.

4. Ўзбекистон Республикаси Прокуратураси хўжалик юритувчи субъектлар раҳбарларининг иш ҳақини ўз вақтида тўлашнинг амалдаги қонун ҳужжатларига мувофиқ белгиланган тартибга риоя қилиши устидан назоратни кучайтирсин ҳамда иш ҳақи бўйича муддати ўтказиб юборилган қарзлар ҳосил бўлган ҳолларда айбдор шахсларни жиноий жазолашгача жавобгарликка тортсин.

5. Ўзбекистон Касаба уюшмалари Федерацияси Кенгашига, касаба уюшмаларининг тармоқ кенгашларига вазирликлар ва идоралар билан биргаликда меҳнатга ҳақ тўлашни тартибга солишда ва у ўз вақтида тўланишини таъминлашда жамоа шартномаларининг, хўжалик юритувчи субъектларнинг бошқа норматив ҳужжатларининг ролини оширишга доир қўшимча чора-тадбирлар кўриш тавсия этилсин, чора-тадбирларда иш ҳақи ўз вақтида тўланмаганлиги учун иш берувчиларнинг моддий жавобгарлиги чоралари назарда тутилсин.

6. Ўзбекистон Республикаси Адлия вазирлиги манфаатдор вазирликлар ва идоралар билан биргаликда икки ҳафта муддатда:

Вазирлар Маҳкамасига амалдаги қонун ҳужжатларига мазкур қарордан келиб чиқувчи ўзгартириш ва қўшимчалар тўғрисидаги, шунингдек иш ҳақи ўз вақтида тўланиши таъминланмаганлиги ёхуд иш ҳақи тақиқланган шаклда тўланганлиги учун вазирликлар, идоралар, хўжалик юритувчи субъектлар ва тижорат банклари раҳбарларининг жавобгарлигини, шу жумладан моддий жавобгарлигини кучайтиришни назарда тутувчи таклифларни киритсин;

идоравий норматив ҳужжатларни мазкур қарор талабларига мувофиқлаштирсин.

7. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Р.С. Азимов ва Ўзбекистон Республикаси Марказий банки Раиси Ф.М. Муллажонов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2002 йил 19 март,
88-сон

42 Табиий газ етказиб бериш ва унинг учун ҳисоб-китоб қилиш тизимини янада такомиллаштириш тўғрисида

Республика аҳолисига ва иқтисодиёти тармоқларига табиий газнинг узлуксиз етказиб берилишини таъминлашга доир ишларни кучайтириш, газ тармоқларига ноқонуний уланишнинг олдини олиш ва бартараф этиш, шунингдек табиий газ учун тўлик ва ўз вақтида ҳисоб-китоб қилиш мақсадида Вазирлар Маҳкамаси **қарор қилади**:

1. «Ўзкоммунхизмат» агентлиги ва «Ўзбекнефтгаз» миллий-холдинг компаниясининг «Ўзтрансгаз» акциядорлик компаниясининг «Ўзгазсотиш» шўъба унитар корхонасини ҳамда унинг ҳудудий ваколатхоналарини белгиланган тартибда «Ўзкоммунхизмат» агентлигининг «Бошкоммунгаз» корхонаси тасарруфига табиий газни сотиш ва унинг учун истеъмолчилар билан ҳисоб-китоб қилиш бўйича ягона тузилма ташкил этиш мақсадида бериш тўғрисидаги таклифи қабул қилинсин.

2. Белгилансинки:

2002 йил 1 апрелдан бошлаб табиий газни, «Ўзтрансгаз» акциядорлик компаниясининг магистрал газ қувурларига тўғридан-тўғри уланадиган истеъмолчилардан ташқари, улгуржи истеъмолчиларга ва аҳолига сотиш «Ўзкоммунхизмат» агентлиги «Бошкоммунгаз» корхонасининг газ сотувчи ташкилотлари томонидан 1 иловага* мувофиқ амалга оширилади;

«Ўзтрансгаз» акциядорлик компанияси ва «Бошкоммунгаз» корхонаси ўртасида табиий газ учун ҳисоб-китоблар магистрал газ қувурлари ва газ тармоқларининг бўлиниш чегараларида ўрнатилган ҳисобга олиш приборлари кўрсаткичлари бўйича амалга оширилади.

3. «Ўзбекнефтгаз» миллий-холдинг компанияси ва «Ўзкоммунхизмат» агентлиги «Бошкоммунгаз» корхонаси ва «Ўзулгуржисавдо» акциядорлик компанияси ўртасида тузилган контрактга мувофиқ Украинадан клиринг бўйича етказиб беришнинг фойдаланилмаган қолдиқлари ҳисобига сотиб олинган 501 минг АҚШ доллари миқдоридидаги 52 та ҳамда «Ўзбекнефтгаз» миллий-холдинг компаниясининг ўз маблағлари ҳисобига сотиб олинган 248 та газни ҳисобга олиш приборларининг 2002 йилда газ қувурларининг бўлиниш чегараларида алмаштирилиши ва ўрнатилишини таъминласинлар.

4. «Ўзтрансгаз» акциядорлик компанияси ва «Ўзкоммунхизмат» агентлиги улгуржи истеъмолчилар ва аҳолининг дебиторлик ҳамда кредиторлик қарзларини 2002 йил 1 мартдаги ҳолатига кўра хатловдан ўтказсинлар ва 2002 йил 1 апрелгача уларни топшириш-қабул қилишни белгиланган тартибда амалга оширсинлар.

5. Махфий.

6. «Ўзкоммунхизмат» агентлигининг «Бошкоммунгаз» корхонаси 2002 йил 1 апрелдан бошлаб газ сарфини ҳисобга олиш приборлари бўлмаган улгуржи истеъмолчилар билан табиий газ етказиб бериш юзасидан мавжуд шартномаларни бекор қилсин ва янги шартномалар тузмасин.

7. Минтақалар раҳбарларининг Қорақалпоғистон Республикаси Вазирлар Кенгашига, вилоятлар ва Тошкент шаҳар ҳокимликларига ажратилаётган табиий газ ҳажмларидан оқилона ва самарали фойдаланиш масалалари бўйича жавобгарлигини ошириш мақсадида ижтимоий соҳа объектларига ҳамда кичик ва ўрта бизнес субъектларига (тут ипак қурти боқиш, хусусий уйлар ҳовлисидаги иссиқхоналар ва озиқ-овқат пишириш учун) газдан фойдаланиш учун рухсатномалар бериш функцияси Қорақал-

* Илова берилмайди.

поғистон Республикаси Вазирлар Кенгашига, вилоятлар ва Тошкент шаҳар ҳокимликларига минтақа учун белгиланган лимитлар доирасида юклансин.

«Ўзкоммунхизмат» агентлиги, Ўзбекистон Республикаси Молия вазирлиги, Монополиядан чиқариш ва рақобатни ривожлантириш давлат қўмитаси Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан биргаликда минтақалар томонидан ижтимоий соҳа объектлари ҳамда кичик ва ўрта бизнес субъектларига газдан фойдаланишга рухсатномалар бериш тартибини бир ой муддатда ишлаб чиқсинлар.

8. Ўзбекистон Республикаси Давлат мулки қўмитаси «Ўзбекнефтгаз» миллий-холдинг компанияси билан биргаликда қонунчиликда белгиланган тартибда «Ўзтрансгаз» акциядорлик компанияси устав фонди миқдорини акцияларнинг давлат пакетини «Ўзкоммунхизмат» агентлигининг «Бошкоммунгаз» корхонасига берилаётган «Ўзгазсотиш» шўъба унитар корхонаси ва унинг ҳудудий ваколатхоналари мол-мулки қиймати суммасига қисқартириш ҳисобига камайтирсин.

Белгилаб қўйилсинки, «Ўзтрансгаз» акциядорлик компаниясининг «Ўзгазсотиш» шўъба корхонасининг берилаётган мол-мулки қиймати қўшилган қиймат ва даромад (фойда) солиғини ҳисоблаб чиқаришда «Ўзтрансгаз» акциядорлик компаниясининг ҳамда «Ўзкоммунхизмат» агентлиги «Бошкоммунгаз» корхонасининг солиқ солинадиган базасига киритилмайди.

9. Ўзбекистон Республикаси Адлия вазирлиги манфаатдор идоралар билан биргаликда бир ой муддатда Вазирлар Маҳкамасига жисмоний ва юридик шахсларнинг газ тармоқларига ўзбошимчалик билан уланиб олиш, табиий газдан самарасиз фойдаланганлик ва уни ўғирлаганлик учун жавобгарлигини кучайтириш юзасидан таклифлар киритсин.

10. Ўзбекистон Республикаси Ҳукуматининг 3-иловага мувофиқ айрим қарорларига ўзгартириш ва қўшимчалар киритилсин.

11. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари К.Н. Тўлаганов, Қорақалпоғистон Республикаси Вазирлар Кенгашининг Раиси, вилоятлар ва Тошкент шаҳар ҳокимлари зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2002 йил 20 март,
90-сон

Вазирлар Маҳкамасининг
2002 йил 20 мартдаги 90-сон қарорига
3-ИЛОВА

Ўзбекистон Республикаси Ҳукуматининг қарорларига киритилаётган ўзгартириш ва қўшимчалар

1. Ўзбекистон Республикаси Вазирлар Маҳкамасининг «Республика халқ хўжалигини ва аҳолисини газ билан таъминлашни ташкил этишни яхшилаш чора-тадбирлари тўғрисида» 1993 йил 2 декабрдаги 587-сон қарориди:

2-бандда «Янги корхоналарни» ва «корхоналарни газ таъминоти тизимига улаш» сўзларидан кейин «ижтимоий соҳа объектлари ҳамда кичик ва ўрта бизнес субъектлари (ипак қурти боқиш ва хусусий уйлар ҳовлисидаги иссиқхоналар ҳамда овқат тайёрлаш учун) бундан мустасно» сўзлари қўшилсин;

6-бандда «истеъмолчиларни газ таъминоти тармоқларига бундан буён улашни тўхтатишни» сўзларидан кейин «ижтимоий соҳа объектлари ҳамда кичик ва ўрта бизнес субъектлари (ипак қурти боқиш ва хусусий уйлар ҳовлисидаги иссиқхоналар ҳамда овқат тайёрлаш учун) бундан мустасно» сўзлари қўшилсин.

2. Ўзбекистон Республикаси Вазирлар Маҳкамасининг «Табиий газ етказиб бериш ва унинг учун ҳисоб-китоб қилиш тизимини такомиллаштириш тўғрисида» 1999 йил 21 сентябрдаги 439-сон қарорида (Ўзбекистон Республикаси ҚТ, 1999 й., 9-сон, 57-модда):

а) 1-бандда:

биринчи, тўртинчи ва бешинчи хат бошилар чиқариб ташлансин;

олтинчи хат боши қўйидаги таҳрирда баён қилинсин:

«Ўзкоммунхизмат» агентлигининг «Бошқоммунгаз» корхонаси 2002 йил 1 апрелдан эътиборан газ сарфини ҳисоблаш приборларига эга бўлмаган улгуржи истеъмолчилар билан табиий газ етказиб бериш юзасидан мавжуд шартномаларни бекор қилсин ва янги шартномалар тузмасин»;

б) 2-бандда:

иккинчи хат бошидаги «улгуржи истеъмолчилар томонидан» сўзларидан олдин «Ўзтрансгаз» акциядорлик компаниясининг магистрал газ қувурларига тўғридан-тўғри чиқиш имкониятига эга бўлган» сўзлари қўшилсин;

учинчи ва тўртинчи хат бошилар чиқариб ташлансин;

бешинчи хат бошидаги «чакана истеъмолчилар (аҳоли) томонидан» сўзларидан олдин «Ўзтрансгаз» акциядорлик компаниясининг магистрал газ қувурларига тўғридан-тўғри чиқиш имкониятига эга бўлмаган улгуржи истеъмолчилар ва» сўзлари қўшилсин;

в) 7-банд ўз кучини йўқотган деб ҳисоблансин;

г) 9-банднинг биринчи ва иккинчи хат бошилари «Ўзтрансгаз» акционерлик компаниясига» сўзларидан кейин «ва «Бошқоммунгаз» корхонасига» сўзлари билан тўлдирилсин.

3. Ўзбекистон Республикаси Вазирлар Маҳкамасининг 2000 йил 10 январдаги 8-сон қарори билан тасдиқланган Ўзбекистон Республикаси истеъмолчиларига газ етказиб бериш қоидаларида (Ўзбекистон Республикаси ҚТ, 2000 й., 1-сон, 2-модда):

а) 4.1-банд:

қўйидаги мазмундаги иккинчи хат боши билан тўлдирилсин:

«Ижтимоий соҳа объектлари ҳамда кичик ва ўрта бизнес субъектларига (ипак қурти боқиш ва хусусий уйлар ҳовлисидаги иссиқхоналар ҳамда овқат тайёрлаш учун) газдан фойдаланиш учун рухсатнома тегишли равишда Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан минтақа учун белгиланган лимитлар доирасида берилади»;

иккинчи хат боши учинчи хат боши деб ҳисоблансин ва қўйидаги таҳрирда баён қилинсин:

«Вазирлар Маҳкамаси, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан табиий газдан ёқилғи сифатида фойдаланиш учун берилган рухсатнома тегишли равишда янгидан қурилаётган, кенгайтирилаётган, реконструкция қилинаётган ва фаолият кўрсатаётган ишлаб чиқариш объектларини ёки ижтимоий соҳа объектлари ҳамда кичик ва ўрта бизнес субъектларини (ипак қурти боқиш ва хусусий уйлар ҳовлисидаги иссиқхоналар ҳамда овқат тайёрлаш учун) газ билан таъминлашни лойиҳалаш учун асос ҳисобланади.»;

б) 4.3-бандда:

иккинчи хат бошидаги «тўғридан-тўғри шартномалар бўйича» сўзларидан кейин «газ қувурларининг бўлиниш чегарасида ўрнатилган газ ҳисоблаш приборлари бўйича» сўзлари қўшилсин;

учинчи хат боши чиқариб ташлансин;

тўртинчи хат боши қўйидаги таҳрирда баён қилинсин:

«Бошқоммунгаз» корхонасининг газ сотувчи ташкилотларига магистрал газ қувурлари ва тармоқларининг бўлиниш чегарасида хўжалик ҳисобидаги газ сарфини ҳисоблаш приборлари бўйича уни кейинчалик «Ўзтрансгаз» акциядорлик компаниясининг магистрал газ тармоқларига тўғридан-тўғри чиқиш имкониятига эга бўлмаган истеъмолчиларга ҳамда чакана истеъмолчиларга (аҳолига) сотиш учун етказиб берилади».

4. Ўзбекистон Республикаси Вазирлар Маҳкамасининг «Ўзқоммунхизмат» агентлиги тўғрисидаги Низомни, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларининг ҳудудий коммунал-фойдаланиш бирлашмаси тўғрисидаги Намунавий низомни тасдиқлаш ҳақида» 2001 йил 13 февралдаги 74-сон қарори (Ўзбекистон Республикаси ҚТ, 2001 й., 2-сон, 10-модда) билан тасдиқланган «Ўзқоммунхизмат» агентлиги тўғрисидаги Низом 6-бандининг ўн биринчи хат боши «нормативлар бўйича» сўзларидан кейин «улгуржи ва» сўзлари билан тўлдирилсин.

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

44 Давлат тасарруфидан чиқариш ва хусусийлаштириш дастурлари амалга оширилишини, хорижий инвестицияларни жалб этиш фаоллаштирилишини таъминлашга доир қўшимча чора-тадбирлар тўғрисида

Давлат тасарруфидан чиқариш ва хусусийлаштириш жараёнларини янада ривожлантириш ва чуқурлаштириш, корхоналарнинг инвестицияга оид жалб этувчанлигини ошириш, тўғридан-тўғри хорижий инвестицияларни жалб этишнинг қулай шакллари билан фойдаланиш мақсадида Вазирлар Маҳкамаси **қарор қилади**:

1. Вазирлар Маҳкамаси Комплекслари, Давлат мулки қўмитаси, вазирликлар, идоралар, хўжалик бирлашмаларининг Хусусийлаштириш дастурига 1 ва 2-иловаларга* мувофиқ корхоналар ва объектларни қўшимча равишда киритиш тўғрисидаги таклифига розилик берилсин.

Ўзбекистон Республикаси Давлат мулки қўмитаси Вазирлар Маҳкамаси Комплекслари, вазирликлар, идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан биргаликда объектларни давлат тасарруфидан чиқариш, хусусийлаштириш ва сотишнинг келишилган жадвалларини бир ой муддатда тасдиқласин, корхоналарни баҳолаш ва сотишга тайёрлашнинг муддатларини юқори даражада қисқартирган ҳолда жадвалнинг бажарилишини қаттиқ назорат қилсин.

2. Корхоналарни хусусийлаштириш жараёнига, энг аввало яқка тартибдаги лой-

* 1, 2-иловалар берилмайди.

ихалар бўйича хусусийлаштириладиган ва хорижий инвесторларга яхлит сотиладиган корхоналарга хорижий инвестициялар жалб этилишини фаоллаштириш мақсадида Ўзбекистон Республикаси Давлат мулки қўмитаси:

хорижий инвесторларга сотиладиган корхоналарнинг техник диагностикасини ўтказиш ҳамда уларни баҳолаш бўйича молиявий маслаҳатчиларни танлаб олиш тартиботини сезиларли даражада соддалаштириш ва муддатларини қисқартириш масалаларини Жаҳон банки билан икки ой муддатда ишлаб чиқсин;

икки йил мобайнида сотилмаган корхоналар ва объектларнинг (якка тартибда акциялаштириладиган корхоналардан ташқари) акцияларини (улушлари, пайларини), корхоналарни молиявий соғломлаштириш бўйича инвесторлар томонидан бизнес-режалар тақдим этилган тақдирда, инвесторларнинг инвестиция мажбуриятлари қийматини объектнинг нархига киритган ҳолда танлов асосида сотиш тўғрисида белгиланган тартибда Вазирлар Маҳкамасининг Комплекслари билан келишган ҳолда қарорлар қабул қилсин;

корхонани молиявий соғломлаштириш бизнес-режаси ва аниқ инвестиция мажбуриятлари бўлган тақдирда, сотиб олиш тўлови тўлашни 5 йилгача бўлган муддатга узайтириб, давлат мулки кейинчалик инвестор томонидан сотиб олиниши ҳуқуқини берган ҳолда давлат мулкини танлов асосида ишончли бошқарувга бериш амалиётини жорий этсин;

Вазирлар Маҳкамасининг тегишли Комплекслари билан биргаликда мақсадга мувофиқ бўлганда йирик истиқболсиз, зарар кўриб ишлаётган корхоналарни уларнинг мол-мулкини қисмларга бўлиб сотувга қўйиш ҳуқуқи билан, белгиланган тартибда таркибий ўзгартирсин (уларни қайта ташкил этсин).

3. Ўзбекистон Республикаси Давлат мулки қўмитаси, Адлия вазирлиги манфаатдор вазирликлар ва идоралар билан биргаликда бир ой муддатда:

хорижий инвесторлар ўз инвестиция мажбуриятларини тўлиқ бажаргунига қадар, уларнинг акциялар пакетларига эгаллик қилиш ва улардан фойдаланиш шартлари ва тартибини белгилаган ҳолда, биржа ва биржадан ташқари бозорларда давлат активларини сотиш масалаларини тартибга солувчи идоравий норматив ҳужжатларга белгиланган тартибда ўзгартириш ва қўшимчалар киритсинлар;

хусусийлаштириш ва хорижий инвестицияларни жалб этиш жараёнларини тартибга солувчи қонун ҳужжатларини ва Ҳукуматнинг қарорларини хатловдан ўтказсинлар ҳамда, инвесторлар томонидан қабул қилинган инвестиция мажбуриятлари амалга оширилишининг ҳуқуқий таъминланиши масалаларига алоҳида эътиборни қаратган ҳолда, уларни тўлдириш юзасидан Вазирлар Маҳкамасига таклифлар киритсинлар.

4. Хорижий инвестициялар иштирокидаги корхоналар муассисларига эркин муомаладаги валютада олинган ва чет элга репатриация қилишга мўлжалланган дивидендлардан Ўзбекистоннинг фонд бозорида корхоналарнинг акцияларини (улушлари, пайларини) ва объектларни яхлит сотиб олиш учун фойдаланишга рухсат этилсин.

5. Белгилаб қўйилсинки, вазирликлар, идоралар ва хўжалик бирлашмалари томонидан давлат мулки бўлган корхоналарни қайта ташкил этиш, қўшиб юбориш ва тугатиш Ўзбекистон Республикаси Давлат мулки қўмитаси органлари билан албатта келишилган ҳолда амалга оширилади.

6. Ўзбекистон Республикаси Ҳукуматининг 3-иловага* мувофиқ қарорларига ўзгартириш ва қўшимчалар киритилсин.

7. Ўзбекистон Республикаси Адлия вазирлиги, Давлат мулки қўмитаси манфаатдор вазирликлар ва идоралар билан биргаликда бир ой муддатда тегишли идоравий

* 3-илова рус тилидаги матнда берилган.

норматив ҳужжатларга мазкур қарордан келиб чиқувчи ўзгартиришлар киритилишини таъминласинлар.

8. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Ў.Қ. Исмоилов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2002 йил 26 март,
97-сон

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

45 2002-2004 йилларда уй-жой фондини газни ҳисобга олиш приборлари билан жиҳозлашга доир қўшимча чора-тадбирлар тўғрисида

Вазирлар Маҳкамаси қайд этадики, кўрилаётган чора-тадбирларга қарамай Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан 1999-2004 йилларда уй-жой фондини сув ва газни ҳисобга олиш приборлари билан жиҳозлашнинг тасдиқланган дастурида назарда тутилган газни ҳисобга олиш приборлари ўрнатиш топшириқлари бажарилмаган.

Янгидан қурилган ва реконструкция қилинган уй-жойларни газни ҳисобга олиш приборларисиз фойдаланишга қабул қилиш ҳолларига йўл қўйилмоқда. Сув ва газни ҳисобга олиш приборлари ишлаб чиқариш дастури топшириқлари мутлақо қониқарсиз бажарилмоқда. 1999-2001 йилларда республикада Дастурда белгиланган топшириқнинг 7 фоизи ҳажмида газни ҳисобга олиш приборлари ишлаб чиқарилган.

Табиий газдан самарали ва оқилона фойдаланиш, уни истеъмол қилишни ҳисобга олиш даражасини ошириш, ҳамма жойда барча газ истеъмолчиларини газни ҳисобга олиш приборлари билан жиҳозлаш мақсадида Вазирлар Маҳкамаси **қарор қилади:**

1. Қуйидагилар:

2002-2004 йилларда республика ҳудудлари бўйича газлаштирилган уй-жой фондини (квартираларни ва яқка тартибдаги уйларни) газни ҳисобга олиш приборлари билан жиҳозлаш ҳамда республика корхоналарида газни ҳисобга олиш приборлари ишлаб чиқариш жадваллари 1 ва 2-иловаларга* мувофиқ:

газни ҳисобга олиш приборлари ишлаб чиқараётган корхоналарда газни ҳисобга олиш приборларига сервис хизмати кўрсатиш ва уларни таъмирлаш тармоқларини барпо этиш топшириғи 3-иловага* мувофиқ;

Газни ҳисобга олиш приборларини сотиб олиш, уларни квартираларда ва яқка тартибдаги уйларда ўрнатиш ва улардан фойдаланиш тартиби тўғрисидаги Низом 4-иловага мувофиқ;

газни ҳисобга олиш приборлари мавжуд бўлмаган тақдирда аҳолига коммунал-маиший эҳтиёжлар учун бериладиган табиий газнинг ойлик сарфи нормаси 5-иловага мувофиқ тасдиқлансин.

* 1, 2, 3-иловалар берилмайди.

«Ўзкоммунхизмат» агентлигининг «Бошкоммунгаз» корхонаси Ўзбекистон Республикаси уй-жой фондини газ истеъмолини ҳисобга олиш приборлари билан жиҳозлаш жадвалини бажариш бўйича буюртмачи этиб белгилансин.

2. Белгилансинки:

газни ҳисобга олиш приборларини сотиб олиш ҳамда квартираларда ва аҳолининг якка тартибдаги уйларида ўрнатиш «Ўзкоммунхизмат» агентлигининг «Бошкоммунгаз» корхонаси маблағлари ҳисобига амалга оширилади;

тегишлилигидан қатъи назар, квартираларда ва аҳолининг якка тартибдаги уйларида ўрнатилган газни ҳисобга олиш приборларидан фойдаланиш «Ўзкоммунхизмат» агентлигининг «Бошкоммунгаз» корхонаси томонидан амалга оширилади;

газ тармоқларига ўзбошимчалик билан уланиш ҳоллари аниқланган тақдирда айбдор шахслар амалдаги қонунчиликка мувофиқ жиноий жавобгарликкача бўлган жавобгарликка тортиладилар.

3. Газни ҳисобга олиш приборлари ўрнатилмаган янгидан қурилган кўп квартиралари (реконструкция қилинган, мукамал таъмирланган) уйларни фойдаланишга қабул қилиш ва якка тартибдаги уйларни табиий газга улаш таъқиқлансин.

Газни ҳисобга олиш приборлари билан жиҳозланмаган квартиралар ва якка тартибдаги уйларга 2005 йил 1 январдан бошлаб газ етказиб берилмасин.

4. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари «Ўзкоммунхизмат» агентлигининг «Бошкоммунгаз» корхонаси билан биргаликда газлаштирилган уй-жой фондини газни ҳисобга олиш приборлари билан жиҳозлаш жадвалининг бажарилишини таъминловчи Тадбирлар дастурини бир ой муддатда ишлаб чиқсинлар ва тасдиқласинлар.

5. «Ўзкоммунхизмат» агентлиги Газни ҳисобга олиш приборларини сотиб олиш, уларни квартираларда ва якка тартибдаги уйларда ўрнатиш ва улардан фойдаланиш тартиби тўғрисидаги тасдиқланган Низом асосида газни ҳисобга олиш приборларини ўрнатиш, уларга техник хизмат кўрсатиш ва улардан фойдаланиш бўйича намунавий шартномани белгиланган тартибда икки ҳафта муддатда ишлаб чиқсин ва тасдиқласин, унда томонларнинг жавобгарлиги юзасидан қаттиқ чораларни назарда тутсин.

Белгилаб қўйилсинки, истеъмолчи (аҳоли) ва газ етказиб берувчи ўртасида тузилган Газни ҳисобга олиш приборларини ўрнатиш, уларга техник хизмат кўрсатиш ва улардан фойдаланиш бўйича шартнома шартларининг бузилиши белгиланган тартибда судга даъво аризалари бериш учун асос ҳисобланади.

6. Ўзбекистон Республикаси Макроиктисодиёт ва статистика вазирлиги ҳамда «Ўзкоммунхизмат» агентлигининг республика минтақаларида квартираларни ҳамда якка тартибдаги уйларни газни ҳисобга олиш приборлари билан жиҳозлаш учун имтиёзли кредитларни, шу жумладан Испания давлат кредит агентлигининг кредитини жалб этиш тўғрисидаги таклифлари қабул қилинсин.

«Ўзкоммунхизмат» агентлиги манфаатдор вазирликлар, идоралар ва хизмат кўрсатувчи тижорат банклари билан биргаликда икки ой муддатда Испания томони билан контракт лойиҳасини келишиб олсин ҳамда унинг асосида уй-жой фондини газни ҳисобга олиш приборлари билан жиҳозлаш лойиҳасининг техник-иқтисодий асосларини белгиланган тартибда тайёрласин ва экспертизадан ўтказсин.

7. Махфий.

8. 2002-2004 йилларда қуйидагилар:

газлаштирилган уй-жой фондини (кўп квартиралари ва якка тартибдаги уйларни) газни ҳисобга олиш приборлари билан жиҳозлаш жадвали доирасида Ўзбекистон Республикасига келтириладиган газни ҳисобга олиш приборлари, шунингдек импорт бўйича харид қилинадиган якка тартибда фойдаланиладиган иситиш қозонларининг хавфсизлик автоматикаси ва тартибга солиш автоматикаси, газ-горелка жиҳозлари, Ўзбекистон Республикаси ҳудудидаги газни ҳисобга олиш приборлари ишлаб чиқарувчиларга

етказиб берилаётган бутловчи материаллар божхона тўловлари тўлашдан (божхонада расмийлаштириш йиғимларидан ташқари);

«Ўзкоммунхизмат» агентлигининг корхоналари аҳолига газни ҳисобга олиш приборлари ўрнатиш ва монтаж қилиш хизматлари бўйича, шунингдек Ўзбекистон Республикасининг газни ҳисобга олиш приборлари ишлаб чиқарувчилари ўзлари ишлаб чиқарган газни ҳисобга олиш приборларини «Ўзкоммунхизмат» агентлигининг «Бошкоммунгаз» корхонасига сотиш бўйича қўшилган қиймат солиғидан озод қилинсин.

9. Ўзбекистон Республикаси Ҳукуматининг 8-иловага мувофиқ қарорларига ўзгартириш ва қўшимчалар киритилсин.

10. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари К.Н. Тўлаганов ва Ўзбекистон Республикаси Бош вазирининг ўринбосари Р.С. Азимов зиммасига юклансин.

Вазирлар Маҳкамасининг Раиси И. КАРИМОВ

Тошкент ш.,
2002 йил 28 март,
99-сон

Вазирлар Маҳкамасининг
2002 йил 28 мартдаги 99-сон қарорига
4-ИЛОВА

Газни ҳисобга олиш приборларини сотиб олиш, уларни квартираларда ва якка тартибдаги уйларда ўрнатиш ва улардан фойдаланиш тартиби тўғрисида НИЗОМ

И. Умумий қоидалар

1. Ушбу Низом газни ҳисобга олиш приборларини маблағ билан таъминлаш, сотиб олиш, квартираларда ва якка тартибдаги уйларда ўрнатиш ва улардан фойдаланиш, шунингдек газни ҳисобга олиш приборларини етказиб берувчи ташкилотлар, газни етказиб берувчи ва истеъмол қилувчи корхоналар ўртасидаги ўзаро ҳисоб-китоблар тартибини белгилайди.

2. Ушбу Низомда қуйидаги атамалар ва тушунчалардан фойдаланилади:

Газни ҳисобга олиш приборлари — қувурлар кесими орқали ўтадиган газнинг аниқ миқдорини бевосита ҳисобга оладиган ҳисоблаш қурилмаси. Приборлар Ўзбекистон Республикасида қабул қилинган бирликларда фойдаланган шкалага эга бўлиши, газнинг турли миқдордаги оқимларини ўлчаш учун зарур ва етарли бўлган грациялар бўйича ишлаб чиқарилган бўлиши ҳамда техника хавфсизлиги, фойдаланиш, таъмирлашга яроқлилик, ўзаро алмаштирувчанлик бўйича техник шартларни қондирадиган, индикатор қурилмалари осон кўринадиган бўлиши керак.

Газни етказиб берувчи — «Ўзкоммунхизмат» агентлигининг «Бошкоммунгаз» корхонаси, унинг шўба корхоналари ва газни бевосита истеъмолчиларга етказиб берувчи бошқа ташкилотлар.

Газни ҳисобга олиш приборларини етказиб берувчи — Ўзбекистон Республикаси ҳудудидаги газни ҳисобга олиш приборлари ишлаб чиқарувчилар ва уларнинг хорижий етказиб берувчилари.

Истеъмолчи — уй-жойнинг эгаси, уй-жойни ижарага олувчи, уй-жой эгалари ширкати.

3. Газни ҳисобга олиш приборларини маблағ билан таъминлаш, сотиб олиш, ўрнатиш ва улардан фойдаланиш илова қилинаётган схемага мувофиқ амалга оширилади.

II. Газни ҳисобга олиш приборларига қўйиладиган талаблар

4. Газ ҳажмини ҳисобга олиш учун «Ўздавстандарт» маркази томонидан синовдан ўтказилган ва Ўзбекистон Республикаси ўлчов воситалари давлат реестрига киритилган, Истеъмолчилар газ таъминоти тармоқларининг кириш жойларига ўрнатиладиган газни ҳисобга олиш приборлари қўлланади.

5. Ўрнатиш учун техник шартларни кондирадиган, ўлчанадиган газ ҳажмига мувофиқ бўлган ва ушбу минтақада ихтисослашган таъмирлаш ҳамда текшириш жихозлари билан таъминланган барча турдаги газни ҳисобга олиш приборлари қўлланади.

6. Газни ҳисобга олиш приборлари газ ҳажмини ўлчашнинг аниқлиги бўйича Истеъмолчини ва Етказиб берувчини кондириши ҳамда назарда тутилаётган энг кўп истеъмол градацияларига мувофиқ бўлиши керак.

7. Ҳисобга олиш приборлари шкаласининг ўлчов бирликлари Ўзбекистон Республикасида қабул қилинган Халқаро бирликлар тизими бўйича миқдорларда ифодланади.

8. Приборлар шкалаларидаги ёзувлар давлат тилида — ўзбек тилида бўлиши керак. Шкалаларидаги ёзувлар рус ва инглиз тилларида бўлган газни ҳисобга олиш приборлари ўрнатилишига йўл қўйилади.

9. Газни ҳисобга олиш приборлари индивидуал паспортга эга бўлиши ва уни тайёрлаган завод ёки уларнинг техник шартларга мувофиқлигини текширган корхона томонидан пломбаланган бўлиши керак. Газни ҳисобга олиш приборининг ҳар бир турини текшириб кўриш даврлари «Ўздавстандарт» маркази томонидан белгиланади.

10. Текшириб кўриш муддати ўтган приборлар носоз ҳисобланади ва фойдаланишга қўйилмайди.

11. Газни ҳисобга олиш прибори панелида қуйидагилар кўрсатилган ёзувлар бўлиши керак:

- приборнинг тартиб рақами ва тайёрланган санаси;
- тайёрлаган завод ёки фирма, тайёрланган мамлакат;
- приборнинг марка белгиси (фирма ва кодланган номи);
- энг кўп газ ўтказиш қуввати;
- энг кам газ ўтказиш қуввати;
- энг юқори ишлаш босими.

12. Прибор унинг техник шартлари ва турига мувофиқ (вертикал, горизонтал) ҳолатда ўрнатилади.

III. Газни ҳисобга олиш приборлари билан жиҳозлаш қатнашчиларининг асосий вазифалари ва функциялари

13. Ўзбекистон Республикаси Молия вазирлиги:

«Ўзкоммунхизмат» агентлиги, Ўзбекистон Республикаси Макроиқтисодиёт ва статистика вазирлиги, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан биргаликда газни ҳисобга олиш приборлари-

ни сотиб олиш ва ўрнатишни маблағ билан таъминлаш, шунингдек хорижий кредитларга хизмат кўрсатиш бўйича манбаларни белгилайди;

«Ўзкоммунхизмат» агентлиги билан биргаликда, ишлаб чиқариш таннархи ва хизмат кўрсатишдан олинadиган ялпи фойдадан келиб чиққан ҳолда, газ етказиб бериш бўйича нархлар (тарифлар)ни белгиланган тартибда шакллантирилади.

14. Газни ҳисобга олиш приборларини етказиб берувчилар «Ўзкоммунхизмат» агентлигининг «Бошкоммунгаз» корхонаси билан тузиладиган контрактларга мувофиқ сертификатланган, Ўзбекистон Республикасининг техник талабларига жавоб берадиган газни ҳисобга олиш приборларини ишлаб чиқариш ва етказиб беришни амалга оширадилар.

15. «Ўздавстандарт» маркази республикада ишлаб чиқариладиган ва импорт бўйича келтириладиган газни ҳисобга олиш приборларини белгиланган тартибда сертификатлашни ва ўлчов воситалари давлат реестрига киритишни ташкил этади. Тегишли ташкилотлар ёки корхоналарга газни ҳисобга олиш маиший приборларини текшириб кўриш ҳуқуқи юзасидан рухсатнома беради.

16. «Ўзкоммунхизмат» агентлигининг «Бошкоммунгаз» корхонаси:

Ўзбекистон Республикаси уй-жой фондиди газни ҳисобга олиш приборлари билан жиҳозлаш жадвалини бажариш бўйича буюртмачи ҳисобланади;

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари, «Ўзкоммунхизмат» агентлиги билан биргаликда 2002-2004 йилларда уй-жой фондиди газни ҳисобга олиш приборлари билан жиҳозлаш дастури топшириқларининг бажарилиши таъминланиши учун тўлиқ жавоб беради;

«Газтаъминот» шўъба корхоналари ҳамда манфаатдор вазирликлар ва идоралар билан биргаликда газни ҳисобга олиш приборларини сотиб олиш, ўрнатиш, кейинчалик улардан фойдаланиш ва уларга техник хизмат кўрсатишни ташкил этишни амалга оширади;

газни ҳисобга олиш приборлари етказиб берувчилар, газни ҳисобга олиш приборларини ўрнатиш бўйича ихтисослашган монтаж ташкилотлари, Ўзбекистон Республикаси Молия вазирлиги билан ҳисоб-китобларни ташкил этишни амалга оширади;

газни ҳисобга олиш приборларини сотиб олиш ва ўрнатиш учун олинadиган кредитларни жалб этиш ва қайтаришни белгиланган тартибда амалга оширади;

истеъмолчилар томонидан приборларнинг қиймати тўлиқ тўлангунгача бўлган даврда газни ҳисобга олиш приборларининг эгаси функциясини бажаради.

17. «Бошкоммунгаз» корхонасининг «Газтаъминот» шўъба корхоналари:

газни ҳисобга олиш приборларини ўрнатиш бўйича ишларни бажариш ҳуқуқига эга бўлган ихтисослашган монтаж ташкилотларини жалб этган ҳолда шартнома асосида истеъмолчиларга газни ҳисобга олиш приборлари ўрнатишни амалга оширадилар;

газни ҳисобга олиш приборларидан фойдаланиш устидан техника назоратини амалга оширадилар;

газни ҳисобга олиш приборларига эга бўлмаган янги қурилган, шунингдек мавжуд уй-жойлар (квартиралар)нинг газ тармоғига уланишига, шунингдек тайёрловчи завод ёки текширувчи корхона томонидан пломбаланмаган, техник шартларга мувофиқлиги текшириш синовидан ўтмаган газни ҳисобга олиш приборлари ўрнатилишига йўл қўйилмаслиги учун жавоб берадилар;

Истеъмолчи талабига биноан, прибордаги мавжуд бўлиши мумкин бўлган носозликларни аниқлаш учун, Истеъмолчига ўрнатилган газни ҳисобга олиш приборини текширишдан ўтказишга мажбурдилар;

Истеъмолчига боғлиқ бўлмаган сабаб билан ишдан чиққан ва фойдаланишнинг

кафолатли муддатидан олдин яроқсиз бўлиб қолган приборлар етказиб берувчи ҳисобига ўз вақтида алмаштирилишини таъминлайдилар;

газни ҳисобга олиш приборларини сотиб олиш ва ўрнатиш учун истеъмочилардан маблағлар йиғишни таъминлайдилар;

газни ҳисобга олиш приборлари ўрнатганлик учун ихтисослашган монтаж ташкилотлари билан ўзаро ҳисоб-китоб қилинишини таъминлайдилар.

«Газтаъминот» шўъба корхоналари газни ҳисобга олиш приборларига эга бўлмаган истеъмочиларга 2005 йил 1 январдан бошлаб газ беришмайди.

18. Газни ҳисобга олиш приборлари ўрнатадиган ихтисослашган монтаж ташкилотлари «Газтаъминот» шўъба корхоналари билан тузилган контрактларга мувофиқ истеъмочиларга газни ҳисобга олиш приборларини монтаж қилиш ва ўрнатишни амалга оширадилар. Бажарилган ишлар учун ўзаро ҳисоб-китоблар «Газтаъминот» шўъба корхоналари билан амалга оширилади.

19. Истеъмочилар (аҳоли):

ўрнатилган газни ҳисобга олиш приборларининг сақланиши ва зарур даражада фойдаланилиши учун жавоб берадилар;

газни ҳисобга олиш приборлари ўрнатилгани учун шартнома асосида ўз вақтида тўловни, шунингдек газни ҳисобга олиш прибори қийматини шартномада белгиланган муддатларда тўлайдилар;

олинган газ қийматини приборлар кўрсаткичларига биноан, амалдаги тарифларга мувофиқ, белгиланган муддатларда тўлайдилар;

газни ҳисобга олиш прибори қиймати тўлиқ тўлангач, унга эгалик ҳуқуқини оладилар.

20. Уй-жой эгалари ширкатлари, фуқароларнинг ўзини ўзи бошқариш органлари:

газ етказиб берувчининг вакиллари билан биргаликда аҳоли ўртасида газдан фойдаланишда аниқ тежамга эришиш учун газни ҳисобга олиш приборларини жорий этишнинг зарурлиги тўғрисида тарғибот-тушунтириш ишларини амалга оширадилар;

кам таъминланган оилаларга газни ҳисобга олиш приборлари ўрнатиш учун тўлов бўйича уларга амалдаги Тартибга мувофиқ моддий ёрдам кўрсатиш шаклида қоплов йўли билан ёрдам кўрсатадилар;

ширкат аъзоларига (маҳалла аҳолисига) ўрнатиладиган газни ҳисобга олиш приборлари қийматини тўлаш бўйича ўзига қарашли мол-мулк билан кафил бўладилар;

«Газтаъминот» шўъба корхоналари билан биргаликда 1991 йилгача қурилган кўп квартиралли уй-жойларни тўлиқ таъмирлаш вақтида уларда газни ҳисобга олиш приборлари ўрнатилишини таъминлайдилар.

IV. Газни ҳисобга олиш приборларини сотиб олиш

21. Газни ҳисобга олиш приборлари уларни Етказиб берувчилар томонидан ишлаб чиқарилади ва «Бошқоммунгаз» корхонасига етказиб берилади.

22. Газни ҳисобга олиш приборлари «Бошқоммунгаз» корхонаси томонидан:

ўз маблағлари ҳисобига;

мамлакатимиз ишлаб чиқарувчиларидан газни ҳисобга олиш приборлари сотиб олиш учун 2002-2004 йилларда «Бошқоммунгаз» корхонасига Ўзбекистон Республикаси Молия вазирлиги томонидан, қайтариш асосида ҳар йили ажратиладиган айланма маблағлар ҳисобига;

мамлакатимиз ва чет эл банклари ҳамда бошқа молия институтларининг кредитлари ҳисобига сотиб олинади.

V. Газни ҳисобга олиш приборларини ўрнатиш

23. «Бошқоммунгаз» корхонаси томонидан сотиб олинган газни ҳисобга олиш приборлари аҳоли квартираларига ва якка тартибдаги уйларга ўрнатилади, кейинчалик уларнинг қиймати Истеъмомолчи томонидан кафолатли муддат мобайнида, лекин газни ҳисобга олиш приборлари ўрнатилган кундан бошлаб кўпи билан 5 йилда тўланади.

24. Истеъмомолчи томонидан газни ҳисобга олиш приборлари қийматини тўлаш шартлари «Бошқоммунгаз» корхонасининг «Газтаъминот» шўъба корхоналари билан аҳоли ўртасида газни ҳисобга олиш приборларини ўрнатиш, унга техник хизмат кўрсатиш ва ундан фойдаланиш юзасидан тузилган шартномада белгиланади.

25. Газни ҳисобга олиш приборлари прибор қиймати Истеъмомолчи томонидан тўлиқ тўлангунга қадар «Бошқоммунгаз» корхонасининг мулки ҳисобланади.

Газни ҳисобга олиш приборининг қиймати тўлиқ тўлангандан кейин унга мулкчилик ҳуқуқи Истеъмомолчига ўтади.

26. Газни ҳисобга олиш приборини ўрнатиш, унга техник хизмат кўрсатиш ва ундан фойдаланиш тўғрисидаги шартнома:

ҳисобга олиш приборининг типи, маркаси, тартиб рақами ва қийматини;

ҳисобга олиш приборининг мансублигини;

шартнома тузилган муддатни;

ҳақ тўлаш шартлари ва миқдорини;

Истеъмомолчи томонидан газни ҳисобга олиш прибори қийматини тўлаш шартларини;

ҳисобга олиш приборини сақлаш, унга хизмат кўрсатиш ва уни таъмирлаш бўйича томонларнинг мажбуриятлари ва жавобгарлигини;

томонларнинг ахдлашувига кўра бошқа шартларни ўз ичига олиши керак.

Янгидан қурилаётган ва мавжуд турар жойда газни ҳисобга олиш приборлари лойиҳа-смета ҳужжатларига мувофиқ ихтисослашган корхоналар томонидан ўрнатилади.

27. Ўрнатиладиган ҳар бир газни ҳисобга олиш приборига якка тартибдаги лойиҳа ёки такрорланадиган ечимни мувофиқлаштириш лойиҳаси ишлаб чиқилади. Ишлаб чиқилган якка тартибдаги лойиҳа қиймати кўп квартирали турар жойнинг мукамал таъмирланиши смета қийматиغا, такрорланадиган мувофиқлаштириш қиймати эса газни ҳисобга олиш приборини монтаж қилиш қийматиغا киритилади.

28. Мавжуд турар жой фондида газни ҳисобга олиш приборлари ўрнатиш ишларнинг кўрсатиб ўтилган турларини амалга ошириш ҳуқуқига эга бўлган ихтисослашган монтаж ташкилотлари томонидан контракт-шартнома асосида бажарилади.

29. Газни ҳисобга олиш приборлари уларнинг бутлигини ва техник ҳолатини кўз билан кўриб назорат қилиш учун хизмат кўрсатувчи ходимнинг приборнинг олдига бемалол бориши, шкала-рақамли қурилманинг кўрсаткичларини ёзиб олиш имкониятини таъминлайдиган, шунингдек хавфсизлик техникаси талабларига жавоб берувчи жойларга ўрнатилади.

30. Газни ҳисобга олиш приборини монтаж қилиш қиймати Истеъмомолчи томонидан Газни ҳисобга олиш приборини ўрнатиш, унга техник хизмат кўрсатиш ва ундан фойдаланиш шартномасига мувофиқ тартибда ва муддатларда «Газтаъминот» шўъба корхонасига тўланади.

VI. Газни ҳисобга олиш приборларидан фойдаланиш

31. Газни ҳисобга олиш приборларидан фойдаланиш:

приборларнинг кўрсаткичлари ва техник ҳолатини назорат қилишни ўз ичига олувчи ҳисобга олиш приборларига техник хизмат кўрсатишни;
вакти-вакти билан текшириш ишларини;
приборларни таъмирлашни;
приборларни ўрнатишни ва ишдан чиққан приборларни алмаштиришни ўз ичига олади.

32. Истеъмолчи томонидан газни ҳисобга олиш прибори қиймати тўлиқ тўлангандан кейин газни ҳисобга олиш приборларига техник хизмат кўрсатиш ва улардан фойдаланиш газ етказиб бериш юзасидан тузилган шартномага мувофиқ амалга оширилади.

33. Газни ҳисобга олиш приборларидан фойдаланишни, шу жумладан ўрнатиш, алмаштириш, техник хизмат кўрсатиш ва кўрсаткичларни назорат қилишни «Бош-коммунгаз» корхонасининг «Газтаъминот» шўъба корхоналари амалга оширадilar.

34. Ҳисобга олиш приборларини текшириш ва таъмирлаш ишлари тегишли текшириш асбоб-ускуналарига ва кўрсатиб ўтилган ишларни бажариш ҳуқуқини берувчи лицензияга эга бўлган ихтисослашган ташкилотлар томонидан амалга оширилади.

35. Газни ҳисобга олиш прибори Истеъмолчи томонидан тўлиқ сотиб олингунга қадар газни ҳисобга олиш приборидан фойдаланиш харажатлари «Бошкоммунгаз» корхонаси ҳисобидан тўланади.

36. Газни ҳисобга олиш прибори қийматини қоплаш ва уни ўрнатиш ҳақини тўлаш, газ учун ҳақ тўлаш, шу жумладан газни ҳисобга олиш приборларидан фойдаланганлик ва уларга техник хизмат кўрсатилганлиги учун ҳақ тўлаш тартиби Истеъмолчи билан Газ етказиб берувчи ўртасида тузиладиган тегишли шартномаларда белгиланади.

VII. Газни ҳисобга олиш приборларидан фойдаланиш қоидалари ва нормалари бузилганлиги учун жавобгарлик

37. Газ етказиб берувчи газни ҳисобга олиш приборининг нормал ишлашини, унинг фойдаланиш хавфсизлиги техник шартларига мувофиқлигини, Истеъмолчига етказиб бериладиган газ ҳажмини ўлчашнинг аниқлигини таъминлайдиган етказиб бериладиган газ сифати учун жавоб беради. Газ етказиб берувчи газни ҳисобга олиш приборининг техник кўрсаткичлари тўғрисидаги маълумотларни, улардан самарали ва хавфсиз фойдаланиш қоидалари ва шартларини, хизмат кўрсатиш (яроқлилиқ) муддатини, техник кўрик ва текшириш синовлари даври ва муддатларини Истеъмолчига маълум қилиши шарт.

38. Пломбалар ва газ таъминотига техник ҳужжатларнинг сақланишини «Бош-коммунгаз» корхонасининг бўлинмалари назорат қиладилар.

39. Ҳисобга олиш прибори пломбасининг бузилганлиги ва техник ҳужжатларнинг сақланиши учун жавобгарлик Истеъмолчига юкланади.

40. Пломба бузилган ва газ таъминотига техник ҳужжатлар мавжуд бўлмаган тақдирда Истеъмолчи газнинг назоратчининг охири ташрифидан бошлаб бир суткада 24 соат ҳисобидан келиб чиққан ҳолда ўрнатилган газдан фойдаланиш жиҳозининг тўлиқ қиймати бўйича ҳисоблаб чиқилган қийматини, шунингдек такрорий текшириш синовлари ишлари қийматини тўлайди.

41. Ҳисобга олиш приборига кафолат муддати газни ҳисобга олиш прибори ўрнатилган вақтдан бошлаб белгиланади. Ҳисобга олиш приборида ишлаб чиқариш нуқсонни ёки прибордан ўлчов воситаси сифатида фойдаланиб бўлмаслигига олиб келган

носозлик аниқланган тақдирда ҳисобга олиш прибори «Газтаъминот» шўъба корхоналари томонидан алмаштирилади.

42. «Бошқоммунгаз» корхонаси бўлинмалари ва газни ҳисобга олиш приборларига техник хизмат кўрсатувчи бошқа ихтисослашган ташкилотлар уч кун муддатда таъмирлашлари ёки, таъмирлаш мумкин бўлмаган тақдирда, носоз приборни Ўзбекистон Республикаси учун сертификатланган соз приборга алмаштириши, Истеъмолчига приборнинг техник шартларига мувофиқлигига доир такрорий текшириш синовларига доир барча материаллар ва маълумотларни бериши шарт.

Истеъмолчи газни ҳисобга олиш прибори носозлиги тўғрисидаги ариза билан Газ етказиб берувчига мурожаат қилган вақтдан бошлаб унинг тўлиқ тикланишигача бўлган даврда газ қийматини олдинги йилдаги ўртача мавсумий газ истеъмолидан келиб чиқиб тўлайди.

43. Истеъмолчи ўрнатилган газни ҳисобга олиш приборларига эҳтиётлик билан муносабатда бўлиши, хизмат кўрсатувчи ходимнинг прибор ўрнатилган жойга тўсиқсиз ўтишини таъминлаши ва приборнинг кўрсаткичлари бўйича олинган газ қийматини амалдаги тарифларга мувофиқ белгиланган муддатларда тўлаши шарт. Приборнинг носозлиги аниқланган тақдирда Истеъмолчи бу ҳақда дарҳол Газ етказиб берувчини хабардор қилиши керак.

44. Газни ҳисобга олиш приборлари қасдан ишдан чиқарилган тақдирда Истеъмолчи газ таъминоти тизимидан узиб қўйилади ва газ бериш бузилган газни ҳисобга олиш приборлари Истеъмолчи маблағлари ҳисобига тузатилгандан кейин тикланади.

Газ тармоқларига ўзбошимчалик билан уланиш ҳоллари аниқланган тақдирда айбдор шахслар амалдаги қонун ҳужжатларига мувофиқ жиноий жазогача жавобгарликка тортиладилар.

45. Газ етказиб берувчи ва Истеъмолчи ўртасида пайдо бўлувчи низолар бўйсуниш тартибида юқори турувчи ташкилот ёки суд томонидан, белгиланган тартибда ҳал этилади.

46. Мазкур Низомнинг, шунингдек Истеъмолчи билан Газ етказиб берувчи ўртасида тузилган Газни ҳисобга олиш приборини ўрнатиш, унга техник хизмат кўрсатиш ва ундан фойдаланиш шартномаси шартларининг бузилиши белгиланган тартибда судга даъво аризалари бериш учун асос ҳисобланади.

Вазирлар Маҳкамасининг
2002 йил 28 мартдаги 99-сон қарорига
5-ИЛОВА

**Газни ҳисоблаш приборлари бўлмаганда
коммунал-маиший эҳтиёжлар учун аҳолига бериладиган
табiiй газ сарфининг ойлик нормалари**

Газ приборларининг тури ва газни сарфлаш мақсади	Ўлчов бирлиги	Газни сарфлаш нормаси, дар ойда куб/м ҳисобида
1. Марказий (якка тартибдаги) иссиқ сув таъминотига эга бўлган уйлардаги овқат тайёрлашга мўлжалланган маиший газ плитаси	1 киши ҳисобига	11,0
2. Марказий иссиқ сув таъминоти ҳамда газ билан сув иситиш мосламалари бўлмаган уйлардаги овқат тайёрлашга мўлжалланган маиший газ плитаси	1 киши ҳисобига	15,0
3. Марказий иссиқ сув таъминоти бўлмаган ёки иссиқ сув таъминоти вақти-вақти билан ишлайдиган уйларда иссиқ сув таъминоти учун газ билан сув иситгич	1 киши ҳисобига	16,0
4. Газ билан иситиш приборининг туридан қатъи назар, календарь йил мобайнида тенг миқдорларда беш ойлик иситиш мавсуми ҳисобидан уйлар, квартираларни якка тартибда иситишда газдан фойдаланилганда:		
а) Қорақалпоғистон Республикасида ва Хоразм вилоятида	иситиладиган бинонинг 1 м ³ ҳисобига	2,5
б) Тошкент шаҳрида ва бошқа вилоятларда	"-"	2,4
5. Моллар учун озуқа тайёрлаш, дағал хашак ва илдизмеваларни буғлаш, шунингдек ичиш ва санитария мақсадлари учун сув иситишни ҳисобга олган ҳолда	бир бош мол ҳисобига: йилқилар учун қорамол, шу жумладан сизирлар учун чўчқалар учун қўй (эчки)лар учун	5,6 23,7 12,5 2,2

Изоҳлар:

1. Бир киши ҳисобига иситиладиган бино нормаси 43 куб метр ҳажмида белгиланади. Иситиладиган бинонинг 43 куб метргачасини иситиш учун фойдаланиладиган газ миқдори учун — 1 киши ҳисобига белгиланган тариф бўйича, иситиладиган бинонинг 43 куб метрдан ортиқ ҳажми учун — бир ярим барабар миқдорда ҳақ тўланади.

2. Истеъмолчи (абонент)да иккита ёки ундан кўп газ плитаси ёки сув иситгич мавжуд бўлганда мазкур приборлар учун газ сарфи нормаси тегишли равишда икки барабар ва ундан кўп оширилади.

3. Қорақалпоғистон Республикаси Вазирлар Кенгаши, вилоятлар ва Тошкент шаҳар

ҳокимликлари томонидан иситиш мавсуми беш ойдан кам ёки кўп этиб белгиланган тақдирда истеъмолчилар (абонентлар) билан қайта ҳисоб-китоб қилинади.

4. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари иқлим шароитларидан келиб чиққан ҳолда ипак курти етиштириш билан шуғулланувчи шахслар учун иситиш мавсумини узайтириш ҳуқуқига эгадирлар.

Вазирлар Маҳкамасининг
2002 йил 28 мартдаги 99-сон қарорига
8-ИЛОВА

Ўзбекистон Республикаси Ҳукуматининг қарорларига ўзгартириш ва қўшимчалар

1. Ўзбекистон Республикаси Вазирлар Маҳкамасининг «Уй-жой фондини сув ва газни ҳисобга олиш приборлари билан жиҳозлаш, уларни Ўзбекистон Республикасида ишлаб чиқаришни ташкил этиш чора-тадбирлари тўғрисида» 1999 йил 1 июндаги 280-сон қарорида (Ўзбекистон Республикаси ҚТ, 1999 й., 6-сон, 30-модда):

1-банддаги «ва газни» сўзлари чиқариб ташлансин, «1-2-иловаларга» сўзлари «1-иловага» сўзлари билан алмаштирилсин;

3-банднинг биринчи ва иккинчи хат бошидан «ва газни» сўзлари чиқариб ташлансин;

4-банднинг учинчи хат бошидан «ва газни» сўзлари чиқариб ташлансин;

1-илова чиқариб ташлансин;

3-илованинг газни ҳисобга олиш приборлари ишлаб чиқариш топшириқларига доир қисми ўз кучини йўқотган деб ҳисоблансин;

2 ва 3-иловалар равишда 1 ва 2-илова деб ҳисоблансин.

2. Ўзбекистон Республикаси Вазирлар Маҳкамасининг «Табий газ етказиб бериш ва унинг учун ҳисоб-китоб қилиш тизимини такомиллаштириш тўғрисида» 1999 йил 21 сентябрдаги 439-сон қарорида (Ўзбекистон Республикаси ҚТ, 1999 й., 9-сон, 57-модда):

5-банд ва 2-илова ўз кучини йўқотган деб ҳисоблансин;

6-банднинг иккинчи хат боши чиқариб ташлансин.

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

46 Ўзгалар парваришига муҳтож ёлғиз кексалар, пенсионерлар ва ногиронларга ижтимоий ёрдам кўрсатишни кучайтириш тўғрисида

Вазирлар Маҳкамасининг 2002 йил 24 январдаги 30-сон қарори билан тасдиқланган «Қарияларни қадрлаш йили» давлат дастурининг 3.9-бандини бажариш ҳамда ўзгалар парваришига муҳтож ёлғиз кексалар, пенсионерлар ва ногиронларнинг уйига

бориб ижтимоий хизмат кўрсатиш билан тўлиқ қамраб олинишини таъминлаш мақсадида Вазирлар Маҳкамаси **қарор қилади:**

1. Ўзбекистон Республикаси Меҳнат ва аҳолини ижтимоий муҳофаза қилиш вазирлигига ижтимоий таъминот бўлимлари орқали, меҳнат бўлимларида рўйхатга олинган ишсиз фуқароларни, ҳақ тўланадиган жамоат ишларини ташкил этиш йўли билан, ўзгалар парваришига муҳтож ёлғиз кексалар, пенсионерлар ва ногиронларнинг уйига бориб ижтимоий хизмат кўрсатишга жалб этиш топширилсин.

2. Белгилаб қўйилсинки, ўзгалар парваришига муҳтож ёлғиз кексалар, пенсионерлар ва ногиронларнинг уйига бориб ижтимоий хизмат кўрсатишга ижтимоий таъминот бўлимлари орқали жалб этиладиган ишсиз фуқароларга иш ҳақи тўлаш (шу жумладан ижтимоий суғуртага ажратмалар) билан боғлиқ харажатларни маблағ билан таъминлаш Иш билан таъминлашга кўмаклашиш давлат жамғармаси маблағлари ҳисобидан амалга оширилади.

3. Ўзбекистон Республикаси Меҳнат ва аҳолини ижтимоий муҳофаза қилиш вазирлиги ҳамда Молия вазирлиги ишсиз фуқароларни ёлғиз кексалар, пенсионерлар ва ногиронларнинг уйига бориб ижтимоий хизмат кўрсатишга жалб этиш тартибини бир ой муддатда ишлаб чиқсинлар ва тасдиқласинлар, унда бир нафар ходим ҳисобига хизмат кўрсатиш нормативларини белгилаш, жалб этиладиган ишсиз фуқароларни уларнинг муайян контингентга хизмат кўрсатишга яроқлилиги ва хоҳишини ҳисобга олган ҳолда комиссия йўли билан танлаш, ушбу ишларни ташкил этиш билан боғлиқ харажатларни Иш билан таъминлашга кўмаклашиш жамғармаси маблағлари ҳисобидан қоплаш тартиби, шунингдек ижтимоий хизмат кўрсатишнинг тўлиқлиги ва сифатини самарали назорат қилиш механизми назарда тутилсин.

4. Вазирлар Маҳкамасининг «Ҳақ тўланадиган жамоат ишларини ташкил қилиш тўғрисидаги Низомни тасдиқлаш ҳақида» 1999 йил 19 июлдаги 353-сон қарорига (Ўзбекистон Республикаси ҚТ, 1999 й., 7-сон, 40-модда) иловага мувофиқ қўшимчалар киритилсин.

5. Вазирлар Маҳкамасининг «Ўзгалар парваришига муҳтож бўлган ёлғиз фуқароларга ижтимоий ёрдам кўрсатишда фуқароларнинг ўзини ўзи бошқариш органлари ролини ошириш тўғрисида» 2000 йил 29 июлдаги 288-сон қарори ўз кучини йўқотган деб ҳисоблансин.

6. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Р.С. Азимов зиммасига юклансин.

Ўзбекистон Республикасининг Бош вазири Ў. СУЛТОНОВ

Тошкент ш.,
2002 йил 29 март,
106-сон

Вазирлар Маҳкамасининг
2002 йил 29 мартдаги 106-сон қарорига
ИЛОВА

Вазирлар Маҳкамасининг «Ҳақ тўланадиган жамоат ишларини ташкил этиш тўғрисидаги Низомни тасдиқлаш ҳақида» 1999 йил 19 июлдаги 353-сон қарорига киритиладиган қўшимчалар

Вазирлар Маҳкамасининг «Ҳақ тўланадиган жамоат ишларини ташкил этиш тўғрисидаги Низомни тасдиқлаш ҳақида» 1999 йил 19 июлдаги 353-сон қарори (Ўзбекистон Республикаси ҚТ, 1999 й., 7-сон, 40-модда) билан тасдиқланган Низомда:

— V қисм қуйидаги 26-банд билан тўлдирилсин:

«26. Ўзгалар парваришига муҳтож ёлғиз кексалар, пенсионерлар ва ногиронларнинг уйига бориб ижтимоий хизмат кўрсатиш бўйича ҳақ тўланадиган жамоат ишларига жалб этилган, меҳнат бўлимларида рўйхатга олинган ишсиз фуқароларга иш ҳақи тўлаш харажатлари тўлиқ Иш билан таъминлашга кўмаклашиш давлат жамғармаси маблағлари ҳисобидан амалга оширилади»;

— 26-банд 27-банд деб ҳисоблансин;

— «Ҳақ тўланадиган жамоат ишларининг намунавий рўйхати»даги (Низомга 2-илова) «Иш мазмуни»нинг 4-банди «ва ўзгалар парваришига муҳтож ёлғиз кексалар, пенсионерлар ва ногиронларнинг уйига бориб ижтимоий хизмат кўрсатиш ишлари» сўзлари билан тўлдирилсин.